

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Roma

Nu quitsaha tyaa ra Pablo carta

¹ Yuhu ra Pablo cuví yu iin ra jahá tyiñu tyiñu ra Jesucristo. Cana Nyoo tsi yu, tan nacatsj ra tsi yu tyin caca yu jacoto yu tuhun tsa jacacú ra tsi yo tsi nyivi. ² Tan tuhun ihya cuví tsa cahan Nyoo tsihin ra cuví ndusu yuhu ra tahañ tsanaha tyin tyaa ra naha nu tutu ra. ³ Juvín tuhun ihya caahán tyin Jutu Mañi yo Jesucristo, Sehe Nyoo, quitsj ra nu ñuhu ñayivi tan nanduvj ra tumaa maa yo. Tan cuvj ra tata ra rey David. ⁴ Tan Nyoo jacoto ra tsi yo tsihin Tatyí Ii ra tyin Sehe ra cuví tsi ra tsa cuenda tsa janandoto ra tsi ra tsihin tunyee iñi tsa iyó tsi ra. ⁵ Tan tsa cuenda ra Jesucristo tsaha Nyoo tumañi iñi tsi ndi tsa caca ndi tyiñu ra, tyin na tsinu iñi nyivi iyó nani cahnú nu ñuhu ñayivi tsi ra tan na tyaa yahvi ñi tsi ra. ⁶ Tan juhva ñi ican cuví tucu nyooho tyin tsa nacatsj ra Jesucristo tsi ndo tyin cuví ndo nyivi cuenda ra.

⁷ Jaquitsí yu carta ihya tsi tandihí nyooho tsa iyó ñuu Roma. Nyoo cuñí xaan ra tsi ndo tan cana ra tsi ndo tyin cuví ndo nyivi ra tan jacahnú ndo tsi ra. Naquihin ndo tsa vaha tan na coo tsa taxin aña ndo jahá Jutu yo Nyoo tan Jutu Mañi yo Jesucristo.

Nu catyí ra Pablo tyin cuñi ra cuhun ra ñuu Roma

⁸ Tsa jihna ñi, tsahá yu tyahvi nyoo tsi Nyoo tsihin sivi ra Jesucristo tsa cuenda tandihi nyooho tyin tandihi ñi ityi caahán nyivi tyin tsinú xaan iñi ndo tsi ra Jesucristo. ⁹ Jahá tyiñu yu tyiñu Nyoo tsihin tsa ñi iñi ñiñima yu. Tan caahán yu tsihin nyivi nácaa jacacú Sehe ra tsi yo. Tsandaa cuví maa Nyoo tyin tsa tsicán tahvi yu tsi ra, tsicán tahvi yu tsa cuenda ndo. ¹⁰ Tan tsicán yu tsi ra na cuvi cuhva cuñí ra, tan quitsi yu nu yucú ndo, tyin tsanaha xaan cuñí yu quitsi yu. ¹¹ Tyin cuñí yu jatyyinyee yu tsi ndo, tan naquihin ndo tsa vaha tsa tsahá ra tsi yo tan cunyicun ñihi ca ndo tsi ra. ¹² Tsa cuñí yu cahan yu tsihin ndo cuví tuhun ihya: tsa jandu iin tahan yo iñi yo tsihin tsa tsinú iñi yo tsi ra.

¹³ Yañi, cuñi yu tsa coto ndo tyin cuaha xaan tsaha cuñí yu quitsi yu quitsi nyehe yu nu yucú ndo, maa tyin nda cuanda vityin tan ñaha ca cuhva tsi cuhva tsi yu. Cuñí yu quitsi yu ñuu ndo tyin cuñí yu cahan ca yu tuhun Nyoo tsihin nyivi tyin tacan tan nducuaha ca ñi tsinu iñi tsi ra, tumaa javaha yu tsihin nyivi inga ca ñuu. ¹⁴ Tyin tsa ñiñi cuñí tsi cahan yu tuhun tsa jacacú ra Cristo tsi yo tsihin nyivi Grecia tan nyivi inga ñuu; tahan ñi nyivi tsa tsitó xaan tan nyivi soho. ¹⁵ Yacan cuenda, cuñí yu cahan yu tuhun ra Cristo tsihin nyooho tsa iyó ndo Roma ihya.

Tuhun Nyoo iyó xaan tunyee iñi itsi

¹⁶ Yuhu ña cahán nuu yu caahán yu tuhun ra Cristo, tyin tunyee iñi Nyoo cuví tsi tan jacacú tsi tsi tandihi nyivi tsa tsinú iñi tsi ra Cristo. Tsa jihna ñi maa ñi maa tsihin nyivi Israel cahan ndi

tuhun ra Cristo, maa tyin vityin caahán ndihí tucu ndi tsihin nyívi tsa ñavin nyívi Israel cuví. ¹⁷ Tyin tuhun Nyoo ihya, janahá tsi tsi yo nácaa janduvahá Nyoo tsi yo. Tan juvin ñi tsahá cuenda tucu tsi tsi yo, tyin janduvahá ra tsi yo tsa cuenda tsa tsinú iñi yo tsi ra tan ñavin náa inga ca cuenda. Catyí nu tutu ra: “Nyívi tsa janduvahá Nyoo añima, iyó ñi ñayívi tsa tsihin tsa tsinú iñi ñi tsi ra.”

Tandihí nyívi tan iyó cuatyí ñi

¹⁸ Nyehé yo tyin Nyoo, ra nyaá gloria, tatsí tuñi ra tsi nyívi ña vaha tsa javahá tsa caquiñi, tyin tsa caquiñi tsa javahá ñi tyasí can nu tsinu iñi inga ca nyívi tsa nditsa. ¹⁹ Tsitó ñi tsa iyó Nyoo tyin juvin ñi maa ra janahá can tsi ñi. ²⁰ Ña cuví catyí yo tyin nduve Nyoo iyó tyin vasu ndi maa ña nyehé yo tsi ra, maa tyin cuví coto yo tsa iyó ra tsihin tsa nyehé yo tandihí tsa javahá ra. Tsanaha javahá ra ñuhu ñayívi tan yacan janahá tsi yo tyin iyó Nyoo tan iyó tunyee iñi tsi ra. Nyívi tsa ña cuñí coto tsi Nyoo ña cua coo tucahnu iñi tsi ñi. ²¹ Vasu ndi maa tsitó ñi tsa iyó Nyoo tsihin tsa nyehé ñi tandihí tsa javahá ra, ña cuñí ñi jacahnu ñi tsi ra tumaa taahán maa tsi jacahnu yo tsi ra. Ña tsahá ñi tyahvi nyoo tsi Nyoo tyin maa ñi maa tsa iyó nu ñuhu ñayívi tyaá jiñi ñi. Tan tsa cuenda yacan ndusohó ñi. ²² Vasu ndi maa catyí ñi tyin tsitó xaan ñi, maa tyin ña nditsa tyin nduve náa tsitó ñi. ²³ Ña jacahnú ñi tsi Nyoo nyito, ra vaha tsa ña cua cúu; maa tyin jacahnú ñi tsitoho tsa caá tumaa caá nyívi tuhvá tsihí, tan nda cuanda tsitoho tsa caá tumaa caá saa, tan coo, tan quití iyó cumi tsaha.

24 Yacan cuenda nacoꝝ Nyoo tsi ñi nu tsa caquiñi tsa javahá ñi. Tan javahá ndihhi tucu ñi tsa caquiñi tsihin cuñu ñuhu iin ñi tan inga ñi tan cuví can ticanuu. 25 Ña cuñí ñi tsinú iñi ñi tuhun Nyoo tsa nditsa, maa tyin tsinú iñi ñi tsa ña nditsa. Tyaá yahvi ñi tsa javahá Nyoo tan jacahnú ñi can, tan ña jacahnú ñi tsi maa ra. Tan intuhun ñi maa ra cuñí tsi jacahnu yo tacan ñi maa. Na cuvi tsi tacan.

26 Yacan cuenda jañá ndaha Nyoo tsi ñi na javaha ñi tsa tsahá ticanuu tsi ñi. Tyin nda cuenda ñiñaha tan tsicoó ñi tsihin ñi nduyhi, tan ña vaha tacan. 27 Tan juvin ñi tacan javahá tucu rayhi, nacoó ra naha tsa iyó ra naha tsihin ñasihhi ra naha, tan iyó ra naha tsihin ra ndusihhi naha ra tan tsahá ra naha ticanuu tsi yañi ra naha. Tan tsa cuenda can tatsí tuñi Nyoo tsi ra naha tan tiví ra naha tsa cuenda tsa caquiñi tsa javahá ra naha.

28 Tan tsa cuenda tsa ña cuñí ca ra can naha ra tan ñi ican naha ñi nacoto ñi tsi Nyoo, nacoꝝ ra tsi ñi naha ñi na caca iñi ñi tsa cuñí maa ñi. 29 Tyin tandihhi nuu tsa ña vaha javahá ñi. Ñiñaha tsicoꝝ ñi tsihin rayhi tan ña tindahá ñi. Rayhi tsicoꝝ ra naha tsihin ñaha tan ña tindahá ra naha. Maa ñi tsa caquiñi javahá ñi. Cuñi ñi coo cuaha ndaha tyiñu ñi. Javahá ñi tsa ndavaha ñi. Nyiyo iñi ñi tsa iyó tsi inga nyivi. Tsahñí ñi nyivi. Cañi tahan ñi tsihin nyivi ñi. Jandaví ñaha ñi. Quiñi iyó ñi tan caahán ñi cuendu. 30 Caahán ñi ndavaha ñi siqui inga nyivi. Ndasí cuñí ñi nyehe ñi tsi Nyoo. Caahán nyaa ñi tsi nyivi. Tan cahnu jahá ñi tsi ñi tan yaa xaan ñi. Janducuahá ca ñi tsa caquiñi. Ña tyaá yahvi ñi tsi jutu ñi, tan ndi tsi sihi ñi. 31 Ña cuñí ñi cutuñi

iñi ñi. Ña javahá ñi tsa catyi ñi tyin cua javaha ñi. Ña cuñí maa ñi tsi ndi intuhun nyivi. Ña tsitó ñi jahá ñi tucahnu iñi tan ña cundaahví iñi ñi nyehe ñi tsi nyivi. ³² Tsitó vaha ñi tyin Nyoo ña cuñí ra tsa javahá ñi tacan. Tan tsitó tucu ñi tyin nyivi tsa javahá tsa caquiñi can, taahán tsi cúu ñi. Maa tyin ña jandihí ñi tsa javahá ñi can, tan tatun inga nyivi javahá tacan, si xaan cuñí ñi.

2

Tatsí tuñi Nyoo tsi nyivi maa tyin tsihin tsa nditsa

¹ Nyooho tsa nyehé cuatyí tsa javahá inga nyivi, iyó cuatyí ndo tyin jacutuñí ndo tsi ñi tsa cuenda cuatyí javahá ñi. Yoñi jaha ndáa nyooho cuví ndo. Tyin tsa jacutuñí ndo tsi ñi, juvin ñi tsi maa ndo jacunaá ndo. Tyin nda maa ndo tan javahá ndihi ndo cuatyí tsa javahá ñi. ² Tsitó yo tyin Nyoo tatsi tuñi ra tsi nyivi tsa javahá tacan, maa tyin tsihin tsa ndaa tan tsa nditsa cua tatsi tuñi ra. ³ Nyooho tsa jacutuñí tsi nyivi tan javahá ndo juvin ñi tsa javahá ñi, cua tatsi tuñi Nyoo tsi ndo. ⁴ ¿Nacuenda ña taahán iñi ndo tsa vaha iñi Nyoo? Tan cunyeé xaan iñi ra nyehe ra tsi yo tsa cuenda tsa cuñí ra tsa nasama ndo kuhva iyó ndo. ⁵ Maa tyin nyooho jandavá xaan ndo añima ndo. Tan ña cuñí ndo nasama ndo kuhva iyó ndo. Tan tsa javaha ndo tacan, Nyoo cuxaán ra tan ñihi ca cua tatsi tuñi ra tsi ndo tsa cuenda can quivi cua tatsi tuñi ra tsi nyivi tsihin tsa ndaa tan tsa nditsa. ⁶ Tan cua tyahvi ra tsi intuhun intuhun yo nácaa taahán maa tsi tsi yo tsa cuenda tsa javahá yo. ⁷ Nyoo cua

cuhva ra ñayivi tsa ña cua naa maa coo nyivi tsa javahá tsa vaha tan nducú ñi tsa cahnu cuví ra tan nducú ñi jacahnu ñi tsi ra, tan cuñí ñi coo cuii ñi tsihin ra. Cua ñihi ñi tandihi yacan tyin nanducú ñi can. ⁸ Maa tyin cuaha ca tsa uhvi cua janyehe ra tsi nyivi tsa javahá tsa cuñí maa ñi, ñi tsa ña tyaá yahvi tuhun nditsa, tan javahá ñi tsa ña vaha. ⁹ Cuaha xaan tundocho tan tsa uhvi cua nyehe tandihi nyivi tsa javahá tsa ña vaha. Tsa jihna ñi cua tatsi tuñi ra tsi nyivi Israel, nyivi cuenda ra. Tan tsa tsinu uvi cua tatsi tuñi ndihi ra tsi nyivi tsa ñavin ñi Israel cuví. ¹⁰ Maa tyin tandihi nyivi tsa javahá tsa vaha, cua cuhva Nyoo tsa cahnu cuví ra tsi ñi. Cua jacahnu ra tsi ñi tan cua cuhva ra tsa taxin coo añima ñi. Jihna ca nyivi Israel cua ñihi tandihi tsa caahán ra tuhun. Tan tsa tsinu uvi, ñi tsa ñavin ñi Israel cuví, cua ñihi ndihi ñi tandihi can.

¹¹ Tyin Nyoo inducu ñi cuñí ra nyehé ra tsi iin yo tan tsi inga yo. Ña tavá tsiyo ra ndi intuhun yo. ¹² Tyin nyivi tsa ñavin ñi Israel cuví, ñi tsa ña tsitó ley Nyoo tsa tyaá ra Moisés, tan javahá ñi tsa ña vaha, cua cunaa ñi, maa tyin ñavin tsa cuenda tsa ña tyaá yahvi ñi ley can. Tan nyivi Israel tsa tsitó ley can, tan javahá ñi tsa ña vaha, cua tatsi tuñi Nyoo tsi ñi tumaa catyí maa ley can. ¹³ Tyin nyivi tsa javahá cuhva catyí ley Nyoo, ñi ican cuví nyivi vaha nuu ra. Maa tyin nyivi tsa tsitó ñi maa ley tan ña javahá ñi tsa catyí ley can, ña cua cacu ñi. ¹⁴ Nyivi tsa ñavin ñi Israel cuví ña tsitó ñi ley, maa tyin tun tacan ñi javaha maa ñi tsa catyí ley, juvin ñi maa ñi cuví ley ñi. ¹⁵ Tyin tsihin cuhva iyó ñi, janahá ñi tyin iyó ley Nyoo tsitsi añima ñi. Tsa tsiñi

tuñi tsa iyó tsi ñi cuví tsandaa tsa cuenda ñi, tyin tuví iñi ñi tatun vaha o ña vaha javahá ñi. ¹⁶ Tacan cua cuví quívi cua jacutuñi ra Jesucristo cuatyí tandíhi nyívi jaha Nyoo. Cua cutuñi tandíhi maa nyívi tsa javahá xeehe cuhva tsicá iñi ñi. Tumaa catyí tuhun Nyoo tsa caahán yu tsihin ndo.

Nyívi Israel nyicún ñi ley Nyoo tsa tyaá ra Moisés

¹⁷ Maa tyin nyooho nyívi Israel cuví ndo, catyí ndo. Tan nyitá iñi ndo ley Nyoo tsa tyaá ra Moisés. Tan nduyaá ñi maa ndo tyin catyí ndo tyin nyívi Nyoo cuví ndo. ¹⁸ Tan tsitó ndo cuhva cuñí Nyoo tan ley can janahá tsi tsi ndo tsa nacatsí ndo tsa vaha. ¹⁹ Tan cuñí tucu ndo tyin vaha jaquihín ityi ndo tsi nyívi cuaa, ñi tsa ña tsitó ley. Jandunditsín ndo nu yucú nyívi nu naa, cuñí maa ndo. ²⁰ Tan cuñí tucu ndo tyin tsitó ndo tandíhi ley Nyoo tan jaquihín ityi ndo tsi nyívi tsa ña tsitó, ñi tsa ñaha ca caca vaha tsihin Nyoo. ²¹ Tatun tsitó ndo jacuahá ndo tsi inga nyívi, ¿nacuenda ña jacuahá ndo tsi maa ndo? Catyí ndo tyin ña vaha suhu yo, ¿nacuenda tyin suhú ndo? ²² Juvín ñi catyí ndo tyin ña vaha coo inga ñaha tsi iin rayíi, o inga rayíi tsi iin ñaha, ¿nacuenda tyin maa ndo javahá ndo tacan? Ndasí cuñí ndo nyehe ndo tsitoho, ¿nacuenda tyin suhú ndo ndaha tyiñu tsa iyó tsitsi vehe ñuhu can? ²³ Nduyaa ndo tsihin tsa tsitó ndo ley Nyoo, tan tsahá ndo ticanuu tsi ra tyin ña tyaá yahvi ndo ley ra. ²⁴ Yacan cuenda catyí tuhun Nyoo tyehen: “Nyívi tsa ñavin nyívi Israel cuví, caahán ñi ndavaha ñi síqui Nyoo tsacatyí nyooho.”.

²⁵ Nditsa tyin circuncición tsa cuví tuñi Nyoo, tsa janahá tyin cuví yo nyívi ra, cuví jatyinyee tsi tsi

ndo. Jatyinyeé tsi tsi ndo tun tyaá yahvi ndo ley Nyoo tsa tyaá ra Moisés. Tun ña tyaá yahvi ndo tsa catyí ley can, nduve náa catyí nyisó ndo tuñi can. ²⁶ Maa tyin rayi tsa nduve tuñi Nyoo nyisó, tan javahá ra cuhva catyí ley can, cua naquihin Nyoo tsi ra tumaa tsatyin nyisó ra tuñi can. ²⁷ Ra tsa ña nyisó tuñi can, tan tyaá yahvi ra ley Nyoo, cua jacutuñi ra tsi nyooho tsa tsitó ley tan ña tyaá yahvi ndo tsa catyí tsi, vasu ndi maa nyisó ndo tuñi Nyoo. ²⁸ Vasu ndi maa cuví ndo nyivi Israel tan nyisó ndo tuñi ra, ña cuvi cuvi ndo nyivi Nyoo tun nduve ley ra iyó aña ndo. ²⁹ Tyin nyivi iyó ley Nyoo aña, ñi ican cuví nyivi Nyoo. Tyin maa Tatyí Ii Nyoo tyaá tuñi ra aña ñi, tan ñavin cuñu ñuhu ñi. Tatyí Ii Nyoo javahá can, ñavin ley tsa tyaá ra Moisés. Nyivi ihya cua cuvi nyivi vaha nuu Nyoo, tan ñavin nuu nyivi.

3

¹ ¿Nacaa jatyinyeé tsa cuví yo nyivi Israel tsi yo? ¿O nácaa jatyinyeé tuñi Nyoo tsi yo? ² Cuaha cuhva jatyinyeé tsi tsi yo. Iin cuhva jatyinyeé tsi tsi yo tyin Nyoo tsahá ra ley maa ra tsi yo tsa cuví yo nyivi Israel. ³ ¿Náa cua cuvi? ¿A cua jandihí Nyoo tsa javaha ra tsa catyi ra tyin javaha ra tun juhva yoo tan ña tsinú iñi yo tsi ra? ⁴ ¡Ña cua jandihí ra! Na cutuñi iñi yo tyin Nyoo ña vatya ra. Vasu ndi maa tandihí nyivi vatya ñi, ra ican javahá ra tandihí tsa caahán ra. Tyin catyí nu tutu ra tyehen: Jutu Mañi yu, cua nyehe nyivi tyin ña vatya un. Tan cua coto ñi tyin nditsa tsa caahán un.

⁵ Tsa caquiñi tsa javahá tandihí yoo, tsa iyó nu ñuhu ñayivi ihya, janahá tyin Nyoo vaha ra.

[Tumaa iin jahma nyahyu tan iin jahma cuitsin; tsa nyahyu iin jahma can janahá tyin inga tsi ña nyahyu tsi. Tacan cuví yo tsihin Nyoo.] Tun tacan ¿a cua catyi yo tumaa catyí nyívi tyin ña vaha tsa tatsi tuñi Nyoo tsi yo tyin janahá yo tyin vaha ra? ⁶ Nyívi catyí ñi tyin ña vaha tatsi tuñi Nyoo tsi yo. Maa tyin ña nditsa ñi tyin Nyoo iyó ndatu tsi ra tsa tatsi tuñi ra tsi tandihí yo.

⁷ Tatun javahá nyívi tsa ña vaha tan yacan janahá tyin Nyoo vaha ra, ¿a taahán tsi tatsi tuñi ra tsi ñi? Catyí ñi tyin ña taahán tsi, maa tyin ña nditsa. ⁸ Tun tsatyin nditsa tsa caahán ñi can, vaha ca javaha yo maa ñi maa tsa caquiñi tacan tan nyehe nyívi tyin Nyoo vaha ra. Yihí ñi catyí ñi tyin tacan jacuahá ndi. Tan ñi tsa caahán tyehen cua tatsi tuñi Nyoo tsi ñi tsacatyí tsa caahán ñi cuendu siquí ndi.

Tandihí yo tan iyó cuatyi yo

⁹ Tan nácaa ¿a vaha ca yoo tsa cuví yo nyívi Israel tan ñavin ca inga nyívi? Ña vaha ca yo. Tyin tsa yahá janahá yu tsi ndo tyin tandihí yo tan iyó cuatyi yo. An cuví yo nyívi Israel, o ña cuví yo nyívi Israel, maa tyin ndacá ñaha cuatyi tsi yo. ¹⁰ Tacan catyí nu tutu Nyoo, nu catyí tsi tyehen: Ndi intuhun nyívi vaha nduve iyó.

¹¹ Nduve nyívi cuñí cutuñi iñi tuhun Nyoo.

Yoñi cuñí nanducu tsi ra.

¹² Tandihí ñi nacoq ñi tsi Nyoo, tan tandihí ñi tan cuanaq ñi.

Ndi intuhun ñi tan ña javahá ñi tsa vaha.

¹³ Jucun ñi cuví tsi tumaa iin ñaña ndiyí tsa ticohó. Tan tsihin yaa ñi caahán ñi cuendu.

Yihí venenu coo yuhu ñi tyin caahán ñi tsi tahan ñi.

¹⁴ Maa ñi tsa ndvaha ñi caahán ñi.

¹⁵ Yatyí xaan tsahñi ñi tsi tahan ñi.

¹⁶ Janyehé ñi tundoho tan tucuihya iñi tsi nyivi tsihin cuhva iyó ñi.

¹⁷ Tan ña tsitó ñi nácaa coo taxin ñi tsihin Nyoo, tan ndi tsihin nyivi.

¹⁸ Ndi ña tsicá iñi ñi tatun coo iin quivi cua tatsi tuñi Nyoo tsi ñi, catyí tuhun Nyoo nu tutu ra.

¹⁹ Tsitó yo tyin tandihi tsa caahán ley Nyoo tsa tyaa ra Moisés, cuví tsi tsa cuenda nyivi tsa yihí ndaha ley can, tyin tacan tan ña cuvi catyi ñi tyin nduve cuatyí ñi iyó. Maa tyin coto tandihi nyivi iyó nu ñuhu ñayivi tyin cua tatsi tuñi Nyoo tsi ñi tsa cuenda cuatyí ñi. ²⁰ Ley can ña cuví janduvaha tsi tsi ndi intuhun yo nuu Nyoo. Iyó tsi tyin tacan tan coto yo tyin iyó cuatyí yo.

Tsa cuenda tsa tsinú iñi yo tsi Nyoo tan nduvaha yo nuu ra

²¹ Maa tyin vityin Nyoo janahá ra tsi yo nácaa janduvahá ra tsi yo nuu ra. Tan janahá ra tsi yo tyin ñavin tsa cuenda ley tan nduvahá yo. Ley ihya tan ra cuvi ndusu yuhu Nyoo janahá nácaa coo vaha yo tsihin Nyoo. ²² Tyin tsa cuenda tsa tsinú iñi yo tsi ra Jesucristo tan naquihín Nyoo tsi yo tumaa tsatyin vaha yo. Tan ña nacatsí ra tsi yo an cuví yo nyivi Israel o ñavin. ²³ Tandihi yo tan iyó cuatyí yo, tan tsa cuenda yacan ña cuvi quihvi yo nu ndacá ñaha Nyoo. ²⁴ Maa tyin tsahá maa ra tsa vaha ra tsi yo, tan yacan jahá tsa naquihin cuenda ra tsi yo tumaa tsatyin vaha yo, tyin tsa yahá tyahvi ra Cristo Jesús tsa cuenda cuatyí yo.

Tan yacan cuenda ña tsicán ca ra yahvi tsi yo. ²⁵ Nyoo jaquitsi ra tsi ra Cristo tyin cúu ra nu cruu tan cati ra niñi ra tsa cuenda cuatyí yo. Tan vityin jaha Nyoo tucahnu iñi tsi yo tatun tsinú iñi yo tsi ra Cristo. Tacan cuvi, tyin nyehe nyivi tyin Nyoo javahá ra tsa vaha. Tahan tsanaha, Nyoo ña tñin cuenda ra cuatyí nyivi tsa cuenda tyin cua quitsi ra Cristo tan janaa ra cuatyí ñi. ²⁶ Tan tacan cuvi tyin vityin nyehé nyivi tyin Nyoo tacan ñi maa vaha ra, tan naquihin ra tsi tandihí yo tsa tsinú iñi tsi ra Jesús tumaa tsatyin vaha yo.

²⁷ ¿A cuví nduyaa yo vityin? Ña cuvi. ¿Nacuenda? Tsa cuenda tyin ña cuví catyí yo tyin javahá yo tandihí tsa catyí ley tan yacan cuenda vaha yo nuu Nyoo. Tyin nduvahá yo nuu ra tsa cuenda tsa tsinú iñi yo tsi ra. ²⁸ Tsa tsitó yo vityin tyin Nyoo naquihín cuenda ra tsi yo tumaa tsatyin vaha yo tsa cuenda tsa tsinú iñi yo tsi ra Cristo, tan ñavin tsa cuenda tsa javahá yo tsa catyí ley o ña javahá yo itsi.

²⁹ ¿A Nyoo cuenda nyivi Israel ñi cuví Nyoo? ¿A ñavin juvin ñi cuví tucu ra Nyoo nyivi tsa ñavin ñi Israel cuví? Juvín ñi cuví tucu ra Nyoo ñi can. ³⁰ Tyin intuhun ñi maa ra iyó. Tan naquihín cuenda ra tsi yo tumaa tsatyin vaha yo tsa cuenda tsa tsinú iñi yo tsi ra, a iyó tuñi ra cuñu ñuhu yo tumaa tsa iyó tsi tsi nyivi Israel, o nduve. ³¹ Tatun tacan, ¿a cuñí tsi catyí tyin nduve ca yahvi nyaá ley tsahnu can? ¡Ñavin tsa nduve yahvi nyaá tsi! Cahnu cuví tsi, tan vityin tsihin tunyee iñi maa ra Cristo janahá yo tyin nditsa tsa cahnu cuví tsi.

4

Cuhva tsicoo ra Abraham janahá tsi tsi yo nácaa nduvahá yo nuu Nyoo

¹ ¿Náa catyí yo tsa cuenda ra Abraham, tsii tsaahnu yo? ¿Nacuenda naquihín cuenda Nyoo tsi ra tumaa tsatyin vaha ra? ² Tun tsatyin naquihín cuenda Nyoo tsi ra tsa cuenda tsa javahá ra tsa vaha, cuví nduyaa ra tsihin can, maa tyin ñavin nuu Nyoo. ³ ¿Náa catyí nu tutu Nyoo? Catyí tsi tyin ra Abraham tsinu íñi ra tsi Nyoo, tan tsa cuenda yacan, Nyoo naquihín ra tsi ra tumaa tsatyin vaha ra. ⁴ Vaha, vityin cua cuhva yu iin cuhva tsi ndo: Ra jahá tyiñu, quihín ra yahvi tsa cuenda tyiñu jahá ra tan ña tuhvá nyívi cuhva maa xuhun tsi ra tun ña jahá tyiñu ra. ⁵ Maa tyin iin ra tsa ña jahá tyiñu tan ñihi ra tsa ñihi ra, ñihi ndaahvi ra itsi cuví can. Tacan cuví nyívi iyó cuatyí tsa ña nducú cacu tsihin tsa javahá ñi cuhva catyí ley, tan tsinú íñi ñi tyin Nyoo naquihín cuenda ra tsi yo tumaa tsatyin vaha yo tun tsinú íñi yo tsi ra. ⁶ Ra David cahan ra siqui tsa sii cuví tsi nyívi tsa naquihín cuenda Nyoo tumaa tsatyin vaha ñi tan ña tñin cuenda ra cuatyí tsa javahá ñi. ⁷ Tyehen catyí ra David: Sii xaan cuví tsi nyívi tsa jahá Nyoo tucahnu íñi tsi tan ña jahá ra cuenda cuatyí ñi.

⁸ Sii xaan cuví tsi ñi tsa ña tñin cuenda Nyoo cuatyí.

⁹ ¿A cuñí maa ndo tyin tsa cuenda nyívi nyisó tuñi Nyoo ñi cuví tusii íñi ihya, o cuví tucu tsi tsa cuenda nyívi ña nyisó tuñi can? Tsa yaha catyí yo tyin Nyoo jahá ra tyin vaha ra Abraham tsa cuenda tsa tsinu íñi ra tsi ra. ¹⁰ ¿Ama javahá Nyoo yacan tsihin ra Abraham? ¿A tsa ndi cumañi

ca cunyaa tuñi can tsi ra, o tsa tsa yaha? Ñavin tsa tsa yaha, tyin tsa ndi cumañi ca. ¹¹ Yaha tsa naquihin Nyoo tsi ra Abraham tumaa tsatyin vaha ra, tacan tan tsinyaa tuñi can tsi ra tumaa iin seña tyin tsa yaha nduvaha ra nuu Nyoo tsa cuenda tsa tsinu iñi ra tsi ra. Tan tsa cuenda yacan cuví ra Abraham tumaa jutu tandihí yoo tsa tsinú iñi tsi Nyoo vasu ndi maa ña nyisó yo tuñi Nyoo. Tan yacan cuenda Nyoo jahá ra tyin vaha yo. ¹² Nditsa tyin ra Abraham cuví tucu ra jutu nyivi Israel, tandihí ñi tsa nyisó tuñi Nyoo tan tsinú tucu iñi ñi tsi Nyoo tumaa tsa tsinu iñi maa ra Abraham, tsii tsahnu yo, quivi tsa ñaha ca cunyaa tuñi can tsi ra.

Tsihin tsa tsinú iñi yo ñihí yo tsa tsahá Nyoo tsi yo

¹³ Nyoo catyi ra tsihin ra Abraham tan tsihin tata ra tyin cua kuhva ra tsa cua cundaca ñaha ñi ñuhu ñayivi tsihin ra. Maa tyin tsa cahan Nyoo can tsihin ra, ñavin tsa cuenda tyin javahá ra tsa catyí ley, maa tyin tsa cuenda tyin tsinú iñi ra tsi Nyoo, tan Nyoo naquihin ra tsi ra tumaa tsatyin vaha ra. ¹⁴ Tun tsatyin maa ñi maa nyivi tsa javahá kuhva catyí ley, cua ñihi tsa cua kuhva Nyoo, nduve náa catyí tsinú iñi yo tsi ra, tan nduve yahvi nyaá tsa catyi ra tyin kuhva ra tsa cua kuhva ra tsi yo tun tsinú iñi yo tsi ra. ¹⁵ Tyin ley can janahá tsi tyin taahán tsi tatsi tuñi Nyoo tsi yo tatun ña javahá yo kuhva catyí tsi. Maa tyin tun tsatyin nduve ley iyó, ña cua coo cuatyí yo.

¹⁶ Yacan cuenda ñihí yo tsa catyi Nyoo tyin kuhva ra tsi yo tsa cuenda tsa tsinú iñi yo tsi ra, tyin tacan tan cuví tsi tumañi iñi tsa tsahá ra tsi

tandihí yoo tsa cuví tata ra Abraham. Ñavin maa ñi nyívi tsinú iñi tsi Nyoo tan tyaá yahvi ley tsa tyaá ra Moisés cua ñihi tsa cua cuhva Nyoo, tyin cua ñihi ndihí tucu nyívi tsa ña nyitá iñi ley, tatun tsinú iñi ñi tsi ra tumaa tsa tsinú iñi ra Abraham. Ra ihya cuví jutu tandihí nyívi tsa tsinú iñi tsi Nyoo. ¹⁷ Tyin catyí ra nu tutu ra tyehen: “Yooho cua cuvi tumaa jutu nyívi cuaha tsa cua coo nu ñuhu ñayívi”, catyí ra tsihin ra Abraham. Tan tsa catyí ra tacan, cuñí tsi catyí tyin cuví yo tata ra Abraham nuu Nyoo. Tsinú iñi ra tsi Nyoo, tyin Nyoo janandotó ra ndiyi tan caahán ra tuhun tsa ñaha ca coo tumaa tsatyin tsa iyó tsi.

¹⁸ Ra Abraham tsa tsahnu xaan ra quívi tsa catyí Nyoo tyin cua coo sehe ñasíhi ra, tan tsitó ra tyin ña cuví ca coo sehe ñi. Maa tyin tsinú iñi ra tan ñihí ra tsa cahán Nyoo tsihin ra. Tan cuví ra jutu nyívi cuaha, tumaa cahán maa Nyoo tsihin ra: “Tyehen cua nducuaaha nyívi tata un”. ¹⁹ Vasu ndi maa tsa yatyin ña iin cientu cuiya ra Abraham, ña jandihí ra tsa tsinú iñi ra. Tahan ñi maa ra tan ña Sara ñasíhi ra, ña cuvi ca coo sehe ñi, tyin tsa cuyatyin cuii cúu ñi tyin tsahnu xaan ñi. ²⁰ Maa tyin ña ndu uví iñi ra tsa cua ñihi ra tsa catyí Nyoo tyin cuhva ra tsi ra. Tsinú iñi ra tsihin tsa ñi iñi añima ra. Tan ña jandihí ra tsa nyitá iñi ra tsi Nyoo. Tan jacahnú ra tsi Nyoo, ²¹ tsa cuenda tyin tsitó vaha ra tyin Nyoo iyó tunyee iñi tsi ra tsa javaha ra tsa catyí ra tsihin ra. ²² Yacan cuenda Nyoo naquihín ra tsi ra tsa cuenda tsa tsinú iñi ra tsi ra.

²³ Tuhun tsa nyaá nu tutu Nyoo tsa catyí tyin naquihín Nyoo tsi ra Abraham tsa cuenda tsa tsinú iñi ra tsi ra, ñavin tsa cuenda ra Abraham

ñi cuví tsi, ²⁴ tyin tsinyaā tucu tsi tsa cuenda yoo. Tyin naquihín Nyoo tsi yo tsa cuenda tsa tsinú iñi yo tsi ra, tyin juvin ra janandotō tsi ra Jesús, Jutu Mañi yo. ²⁵ Ra Jesús quítsi ra quítsi cúu ra tsa cuenda cuatyi yo, tan nandotō ra tyin tacan tan cuvi nduvaha yo nuu Nyoo.

5

Tsa cua ñihi yo tsa cuenda tsa nacoq̄ vaha yo tsihin Nyoo

¹ Tsa yahā̄ nduvahā̄ yo nuu Nyoo tsa cuenda tsa tsinú iñi yo tsi ra. Tan vityin iyó vaha yo tsihin ra jahā̄ Jutu Mañi yo Jesucristo. ² Tyin tsa cuenda ra Cristo ñihí yo tsa vaha Nyoo tyin tsinú iñi yo tsi ra. Tan iin cuñí yo tyin tsa naquihín yo can. Tan sñi cuñí yo tyin cua cuhva ra tsa cahnú cuvi yo tan javaha yo tsa cuñí maa ra tyin javaha yo. ³ Tan ñavin tsa cuenda yacan ñi taahán tsi cusí iñi yo, tyin taahán tucu tsi cusí iñi yo tun nyehé yo tundoho. Tyin tsitó yo tyin tun cunyeé iñi yo nyehé yo tundoho, tacan cua cunyeé iñi yo cuatu yo nda cuanda ñihi yo tsa cua cuhva Nyoo tsi yo. ⁴ Tatun cunyeé iñi yo yahá yo tandihí tundoho, sñi cuñí Nyoo tsihin yo. Tan tsa cuenda yacan tsitó vaha yo tyin cua quita vaha yo nuu ra. ⁵ Tatun tsitó yo tyin cua quita vaha yo nuu ra, ña taahán tsi nducahan nuu yo nyehé yo tsi ra, tyin Tatyí li ra tsa tsahā̄ ra coo ñima yo janahá tsi tsi yo tyin cuñí xaan ra tsi yo.

⁶ Tsanaha yoo ña ñihí yo cuhva jacacū maa yo tsi yo. Tacan tan quiví tahān maa tsi quítsi ra Cristo, quítsi cúu ra tsa cuenda cuatyi yo. ⁷ Tsitó yo tyin

ndi intuhun yo tan ña cana iñi yo cúu yo tsa cuenda inga nyivi, vasu ndi maa vaha ñi. Maa tyin tun vaha xaan iñi nyivi can vasiqui cahnya iñi iin yo cúu yo tsa cuenda ñi. ⁸ Maa tyin Nyoo jaquitsi ra tsi ra Cristo, tan yacan janahá tsi yo tyin cuñi xaan ra tsi yo. Quitsi ra quitsi cúu ra tsa cuenda yo vasu ndi maa iyó xaan cuatyí yo. ⁹ Tan tsa cuenda tsa tsihi ra Cristo, nacoó vaha yo tsihin Nyoo. Tan vityin tsitó vaha yo tyin cua cacu yo tan ña cua cuhun yo anyaya quivi cua tatsi tuñi Nyoo tsi nyivi ña tsinú iñi tsi ra. ¹⁰ Tahan tsanaha xaan iñi yo tsi Nyoo, maa tyin vityin iyó vaha yo tsihin ra tsa cuenda tsa tsihi ra Cristo, Sehe ra. Yacan cuenda tsa nyitá vaha iñi yo tyin cua jacacu ra tsi yo tsa cuenda tsa iyó yo ñayivi Sehe ra, tyin tsa iyó vaha yo tsihin ra. ¹¹ Tan ñavin yacan ñi, taahán tucu tsi cusii iñi yo tsihin Nyoo tyin tsa cuenda Jutu Mañi yo Jesucristo tan nduvaha iyó yo tsihin ra.

Ra Adán tan ra Cristo

¹² Tsanaha intuhun ñi rayii tsicoó cuatyí, tan tsa cuenda intuhun ñi ra can tsaá cuatyí nanii ñuhu ñayivi tan tsicoó tuhun tsiihi. Tan tuhun tsiihi can nacuña can tyin tandihi nyivi tan tsicoó cuatyí ñi. ¹³ Tsanaha tsa ndi cumañi ca cuhva Nyoo ley ra tsi ra Moisés tan tsa iyó maa cuatyí nyivi, maa tyin ña tñn cuenda Nyoo cuatyí ñi tsa cuenda tyin nduve ley iyó. ¹⁴ Maa tyin nda cuanda quivi tsicoó ra Adán tan nda cuanda quivi tsicoó ra Moisés, tsindaca ñaha tuhun tsiihi tsi tandihi nyivi tyin iyó cuatyí tandihi ñi, vasu ndi maa ña javahá ñi tumaa javaha ra Adán tsa ña tyaá yahvi ra tsa cahan Nyoo

tsihin ra. Ra Adán quitsu ra tsihin cuatyí, maa tyin ra Cristo quitsu ra jacacu ra tsi yo.

¹⁵ Maa tyin cuatyí ra Adán ña cuví jandu inducu yo can tsihin tsa tsahá Nyoo tsi yo. Tyin tsa cuenda cuatyí intuhun ra can, tan tsihi cuaha nyivi. Tacan tucu vityin, Nyoo jacacú ra tsi yo tsa cuenda intuhun rayii, ra Jesucristo. Tan cahnu ca cuví tsa tsahá Nyoo tsi yo, tan tsa vaha tsi tandihi nyivi cuví tsi. ¹⁶ Cuatyí ra Adán ña cuví jandu inducu yo can tsihin tsa jacacú Nyoo tsi yo. Tyin tsa cuenda intuhun ñi cuatyí can, Nyoo tatsí tuñi ra tsi tandihi nyivi. Maa tyin vityin Nyoo ña cuñí ra yahvi tan jacacú ra tsi yo. Naquihín ra tsi yo tumaa tsatyin vaha yo, vasu ndi maa cuaha cuatyí yo tsicoo. ¹⁷ Nditsa tyin quitsahá ndacá ñaha tuhun tsihi tsi tandihi nyivi jahá cuatyí tsa javahá ra can, maa tyin vityin ña cuví ca quihí ndaha can tsi ñi tsa tsa nduvahá nuu Nyoo, ñi tsa iin nyita ñi naquihín tsa vaha ra. Ñi ican iyó ñi ñayivi tsa tan yihí ndaha ñi tsi ñi tan tsi nu ña vaha jahá intuhun rayii, ra Jesucristo.

¹⁸ Nyoo tatsí tuñi ra tsi tandihi nyivi iyó nu ñuhu ñayivi tsa cuenda cuatyí ra Adán. Maa tyin vityin tsahá ra tsa coo vaha yo tsihin ra tan coo yo ñayivi nyito tsa cuenda tsa vaha tsa javahá ra Jesucristo. ¹⁹ Cuñí tsi catyí tyehen: Tsa cuenda tsa ña tyaa yahvi iin rayii tsa cahan Nyoo, cuaha xaan nyivi tsicoo cuatyí. Ra ican cuví ra Adán. Tan vityin cuaha xaan nyivi cua nduvaha nuu Nyoo tsa cuenda tsa tyaa yahvi inga ra tsa cahan Nyoo. Tan ra ican cuví ra Cristo.

²⁰ Nyoo tsahá ra ley tsi ra Moisés tyin tacan tan coto nyivi tyin iyó cuatyí ñi. Tan vasu ndi maa

nducuahá ca cuatyí tsa cuenda ley can, tsa vaha Nyoo nducuahá tucu tsi tyin cahnu ca tucahnu iñi iyó tsi ra tsihin yo. ²¹ Tahañ tsanaha, cuatyí yo quítsi ndaca tuhun tsiihí, tan yacan yihí ndaha tsi yo. Maa tyin vityin tsa vaha Nyoo jahá tsa iyó vaha yo tsihin ra tan yihí ndaha tsi tsi yo. Tan tsa tacan yihí ndaha tsi tsi yo, tsahá Nyoo ñayivi nyito tsa ña cua naa maa coo yo tsa cuenda Jutu Mañi yo Jesucristo.

6

Ña cua javaha ca yo tsa caquiñi tyin cua javaha yo cuhva catyí ra Cristo

¹ ¿Náa cua javaha yo vityin? ¿A cua javaha ca yo cuatyí tyin tacan tan janaha Nyoo tyin iyó xaan tucahnu iñi tsi ra tsihin yo? ² Ña vaha. Tyin yoo tsa tsa ndu uví iñi cuatyí tumaa tsa tsihí cuatyí yo cuví can. Tan yacan cuenda, ña cuví ca javaha yo tsa caquiñi vityin. ³ ¿A ña tsitó ndo tyin tsa tsicoondutyá yo janahá tsi tyin ndu iin yo tsihin ra Cristo Jesús? Yacan cuñí tsi catyí tyin tsa yahá tsihí yo tsihin ra. ⁴ Tsa quihví yo tsitsi ndutya tsa tsicoó ndutya yo cuví tsi tumaa tsa tsihí yo tan quihví ñuhu yo tsihin ra Cristo tsa tsihí ra. Tan tumaa tsa nandotó ra Cristo jahá Nyoo tsihin tunyee iñi ra, tacan nandotó tucu yo tsa quitá yo tsitsi ndutya tsa tsicoondutyá yo. Tan vityin iyó yo ñayivi tsa tsihin ra.

⁵ Tumaa tsa tsihí ra Cristo, tacan tsihí tucu cuatyí yo, tyin tacan tan ña javahá ca yo tsa caquiñi. Tan tumaa tsa tsihí yo tsihin ra, tacan cua nandoto tucu yo tumaa nandotó ra. ⁶ Tan tsitó yo tyin

tandihí cuhva tsicoo yo tahañ tsanaha, tsa yaha tsihi can nu cruu tsihin ra Cristo, tyin tacan tan ña cundaca ñaha ca cuñu ñuhu cuatyí yo tsi yo, tan ña javaha ca yo cuatyí. ⁷ Tyin nyivi tsa tsa yaha tsihi, ña cuví ca javaha ñi tsa caquiñi. ⁸ Tan yoo tsa tsa tsihi tsihin ra Cristo, nyitá iñi yo tyin cua coo yo tsihin ra. ⁹ Tsitó yo tyin ra Cristo nandoto ra tsa yaha tsihi ra, tan vityin ña cúu ca ra tyin nduve ca tunyee iñi iyó tsi tuhun tsiihi tsa cahñi can tsi ra. ¹⁰ Ra Cristo iin tsaha ñi tsihi ra, tan tsihi ra tsa cuenda cuatyí yo, tan ña cua cúu ca ra. Vityin iyó ra, tan iyó ra tsa cuenda maa Nyoo. ¹¹ Tan tacan tucu nyooho, ña javaha ca ndo tsa caquiñi. Ña naa iñi ndo tyin tsa yaha tsihi ndo tan tsa tsindihí cuatyí ndo. Tan coo ndo cuhva cuñí Nyoo tsihin tsa iin ñi cuví ndo tsihin ra Cristo Jesús Jutu Mañi yo.

¹² Yacan cuenda ña cuhva ca ndo tsa jaha canaa cuñu ñuhu cuatyí ndo tsi ndo. Ña cuhva ndo ndatu tsa jañiñi cuñu ñuhu ndo tsi ndo tan javaha ndo tsa ña vaha tsa cuñí tsi. ¹³ Ña cuhva ndo ndatu tsi cuñu ñuhu ndo tsa javaha ndo tsa caquiñi. Nacuhva cuenda ndo tsi ndo tsi Nyoo, tyin tsa yaha tsihi yo tan nandoto yo. Cuhva cuenda ndo cuñu ñuhu ndo tsi Nyoo tyin tacan tan javaha ndo tsa vaha. ¹⁴ Tyin nduve ca tunyee iñi iyó tsi cuñu ñuhu cuatyí yo tsa cundaca ñaha can tsi yo. Tyin ñavin ca ley tsa tyaa ra Moisés yihí ndaha tsi yo; tyin vityin tsa vaha tsa tsahá Nyoo tsi yo, yacan yihí ndaha tsi yo.

Musu tsa javahá tsa vaha

¹⁵ ¿Náa cua javaha yo vityin? ¿A cua javaha ca yo cuatyí tsa cuenda tsa iyó yo tsihin tsa vaha Nyoo

tan tsa cuenda tyin ña ndacá ñaha ca ley tsi yo? Ñavin. ¹⁶ Nyooho tsitó vaha ndo tyin iin musu, taahán tsi javaha ra tsa caahán tsitoho ra. Tan tacan cuví yo musu tsa tuhvá yo tyaá yahvi. Tun tyaá yahvi yo tsa caquiñi, musu tsa caquiñi can cuví yo, tan cua cunaa yo jahá tsa caquiñi can tyin tyaá yahvi yo tsi can. Maa tyin tun tyaá yahvi yo tsi Nyoo, cua cuví yo nyívi vaha nuu ra. ¹⁷ Tyahvi nyoo tsi Nyoo, tyin vasu ndi maa nu quítsi tsi cuví ndo musu tsa caquiñi maa tyin vityin tyaá yahvi ndo tuhun Nyoo tsa cutuhvã ndo tsihin tsa nii iñi añima ndo. ¹⁸ Tsa yaha ndatsi cuatyí ndo, tan vityin ña ndacá ñaha ca can tsi ndo, tyin vityin ndacá ñaha tsa vaha Nyoo tsi ndo. ¹⁹ (Caahán yu tsihin ndo cuhva tsa ña yí ñi cutuñi iñi ndo tyin nyooho ñaha ca cutuñi vaha iñi ndo tuhun Nyoo.) Tumaa tsa tsahã cuenda ndo cuñu ñuhu ndo tsi tsa caquiñi tahañ tsanaha tan javahã ndo tsa ña vaha; tacan tucu vityin cuhva cuenda ndo cuñu ñuhu ndo tsi Nyoo tyin tacan tan coo ndo ñayívi cuíti, tan javaha ndo maa ñi maa tsa vaha nuu ra.

²⁰ Quiví tsiquihí ndaha cuñu ñuhu cuatyí ndo tsi ndo, musu can cuví ndo, tan ña yihí ndaha tsa vaha Nyoo tsi ndo. ²¹ Maa tyin nduve náa ñihí ndo tsihin can, tan vityin cahán nuu ndo tsa cuenda tsa javahã ndo tsanaha, tyin maa ñi tuhun tsiihí tsahá can. ²² Maa tyin vityin ña ndacá ñaha ca cuatyí tsi ndo tyin tsa tsahã cuenda ndo tsi ndo tsi Nyoo. Tan vaha xaan tyin maa ñi tsa cuñi Nyoo javahá ndo. Tan nu cua ndihí tuhun cua coo cuíi ndo tsihin Nyoo. ²³ Nyívi tsa javahá tsa caquiñi, cua cúu ñi. Maa tyin Nyoo tsahá maa ra ñayívi tsa ña cua naa maa coo yo tsa cuenda tsa iin ñi cuví yo tsihin ra

Cristo Jesús, Jutu Mañi yo.

7

Ley tsahnu ña ndacá ñaha ca tsi tsi nyivi yihí cuenda ra Cristo

¹ Yañi, nyooho tsa tsitó ley, tsitó ndo tyin tsitsi tsa ndi nyito nyivi yihí ndaha ley tsi ñi. ²⁻³ Tumaa iin ñaha tsa iyó yihí, catyí ley tyin coo ña tsihin yihí ña nda cuenda cúu ra. Maa tyin juvin ñi catyí tucu ley tun cúu yihí ña tan nandoo ndaahvi ña, ña cua quihí ndaha ca ley can tsi ña. Tan cuvi tindaha ña tsihin inga rayihí tan ña cua coo cuatyí ña. Maa tyin tsitsi tsa ndi iyó yihí ña, ña cuvi coo ña tsihin inga rayihí, tyin tun cua javaha ña tacan, cua coo cuatyí ña nuu Nyoo.

⁴ Tan tacan tucu nyooho yañi. Tsanaha ley Nyoo tsa tyaa ra Moisés yihí ndaha tsi tsi ndo tumaa yihí ndaha iin rayihí tsi ñasihí ra. Maa tyin vityin tsa yaha tsihí ndo tan ña ndacá ñaha ca ley can tsi ndo. Tyin vityin ndacá ñaha inga rayihí tsi ndo tan juvin ra cuví ra Cristo, ra tsa nandoto jaha Nyoo. Tyehen cuví tsehe tyin tacan tan cuatyíñu Nyoo tsi yo. ⁵ Tahan tsanaha tsicoo yo cuhva cuñí cuñu ñuhu yo tan ley tsahnu tsa tyaa ra Moisés catyí tsi tyin ña vaha javaha yo tsa caquiñi. Tan tsa cahán tsi tacan, yoo quitsaha cuñí ca yo javaha yo tsa caquiñi tsa cuñí cuñu ñuhu yo. Tan yacan tsaha tuhun tsihí tsi yo. ⁶ Maa tyin vityin ña ndacá ñaha ca ley tsahnu can tsi yo, tyin tsa yaha tsihí cuñu ñuhu cuatyí yo tsihin ra Cristo. Tan vityin tsa iyó yo ñayivi nyito tsa tsahá Tatyí Ii Nyoo tsi yo, na

jaha tyiñu yo tyiñu Nyoo tan ña javaha ca yo tumaa javaha yo quivi yihí ndaha ley tsahnu tsi yo.

Ley Nyoo janahá tyin iyó cuatyí yo

⁷ ¿Náa cua catyí yo? ¿A catyí yo tyin ña vaha ley can? Ñavin tsa ña vaha tsi. Vaha tsi. Tyin tun tsa ña tsaḥ Nyoo ley can, ña cua coto yu náa cuví cuatyí. Tan ndí ña cua coto yu tyin ña vaha nyiyo iñi yu tsa tsii inga nyivi, tun tsatyin ña catyí ley can tyin ña vaha nyiyo iñi yo. ⁸ Tun tsatyin nduve ley can iyó, ña cua coto yu náa cuví cuatyí, tan ña cua cuñi yu javaha yu tsa ña vaha. Maa tyin quivi tsa tsitó yu ley Nyoo, quivi can quitsaha tsicá iñi yu javahá yu tsa ña vaha. Nu nduve ley iyó, ña tsitó nyivi náa cuví tsa ña vaha. ⁹ Quivi tsa ña tsitó yu náa cuñi tsi catyí ley Nyoo tsa tyaa ra Moisés, nyito yu. Maa tyin quivi cutuñi iñi yu tsa caahán ley can, cutuñi iñi yu tyin nuu Nyoo tsa tsihi yu jaha cuatyí yu. ¹⁰ Catyí ley can tyin tatun tyaá yahvi nyivi itsi, cua coo cuí ñi ñayivi nyito. Maa tyin yuhu tsihi yu nuu Nyoo jaha ley can tyin ña tyaa yahvi yu itsi. Tyin catyí tsi tyin nyivi tsa ña tyaa yahvi itsi, taahán tsi cunaa ñi nuu Nyoo. ¹¹ Cuatyí yu tsatyinñu can ley can, tan jandavi ñaha can tsi yu, tyin catyí ley tyin tatun ña tyaa yahvi yo itsi, taahán tsi cunaa yo nuu Nyoo.

¹² Ley can ii xaan tsi tyin tuhun tsaḥ maa Nyoo cuví tsi, tan tandihí tsa catyí ra tyin javaha yo, vaha tsi, tan cuiti xaan tsi. ¹³ Tan ñavin ley vaha ihya jacunaḥ tsi yu. Tyin tsa ña vaha tsa javaha yu, yacan jacunaḥ tsi yu. Yacan cuenda cunaḥ yu nuu Nyoo tyin ley vaha can janaha tsi yu tyin cuatyí cuví tsa javaha yu tsa ña vaha. Tacan tucu vityin

ley can janahá tsi tsi yo tyin yaha xaan ña vaha cuvi cuatyí javahá yo.

Nu tsahá cuenda ra Pablo tsi yo cuhva iyó yo tun ña tsahá yo cundaca ñaha ra Jesucristo tsi yo

¹⁴ Tan tsitó yo tyin maa Tatyí Ii Nyoo tsaḥ ley can, yacan cuenda vaha tsi. Maa tyin yuhu iyó cuatyí yu tyin ra ñayivi cuví yu. Javahá yu tsa caquiñi tyin maa cuatyí can ndacá ñaha tsi yu.

¹⁵ Ña cutuñí iñi yu náa taahán yu, tyin tsa vaha tsa cuñí yu javaha yu, ña javahá yu can. Maa tyin javahá yu tsa ña vaha tsa ña cuñí yu javaha yu.

¹⁶ Tan tsa javahá yu tsa ña cuñí yu javaha yu, tsihin yacan nacotó yu tyin ley Nyoo vaha tsi. ¹⁷ Yacan cuñí tsi catyí tyin ñavin maa yu javahá tsa ña vaha, tyin cuatyí tsa iyó tsi yu, yacan javahá tsa ña vaha.

¹⁸ Yuhu tsitó yu tyin cuñu ñuhu yu nduve tsa vaha iyó. Vasu ndí maa cuñí yu javaha yu tsa vaha, ña cuví javaha yu can. ¹⁹ Ña javahá yu tsa vaha tsa cuñí yu javaha yu, jañihí ca yu javaha yu tsa ña vaha tsa ña cuñí yu javaha yu. ²⁰ Tan tatun javahá yu tsa ña cuñí yu javaha yu, ñavin ca maa yu javahá can, tyin cuatyí tsa yihí ndaha tsi yu, yacan javahá can.

²¹ Nacotó yu tsa taahán yu: tun cuñí yu javaha yu tsa vaha, yatyí xaan ca javahá yu tsa ña vaha.

²² Tsitsi añima yu taahán xaan iñi yu ley Nyoo.

²³ Maa tyin iyó inga ley tan yacan yihí ndaha cuñu ñuhu yu tsihin añima yu. Ña tsahá can tsa javahá yu tsa taahán iñi añima yu. Tan ñihi yihí ndaha can tsi yu tumaa yihí ndaha ra vitya tsi iin ra nyíí vehe caa. ²⁴ ¡Ndahvi yuhu ra ndaahvi! ¿Yóo cua jacacu

tsi yu ndaha tsa ña vahá tsa cuñí cuñu ñuhu yu tan ña cuhun yu anyaya? ²⁵ Tсахá yu tyahvi nyoo tsi Nyoo tsa cuenda ra Jesucristo tyin intuhun ñi maa ra cuví jacacu tsi yu. Vityin cutuñí iñi yu tyin cuñí tsi tyaa yahvi yu ley Nyoo. Maa tyin tun ña tyaa yahvi yu tsi ra Jesucristo, tandihí tsa ña vaha tsa cuñí cuñu ñuhu yu javaha yu, yacan cua quihí ndaha tsi yu.

8

Tatyí Ii Nyoo jatyinyeé tsi tsi yo tan cuví coo yo ñayiví tsaá

¹ Maa tyin vityin, Nyoo ña tatsi tuñi ca ra tsi nyiví tsa iin ñi cuví tsihin ra Cristo Jesús, ñi tsa ña iyó ca cuhva cuñí cuñu ñuhu ñi tyin iyó ñi cuhva cuñí Tatyí Ii ra. ² Tacan tucu yoo, ña ndacá ñaha ca cuatyí tan tuhun tsihi tsi yo tyin vityin ndacá ñaha Tatyí Ii Nyoo tsi yo. Tan juvin tsi tsahá ñayiví tsaá coo yo tsa cuenda tsa iin ñi cuví yo tsihin ra Cristo Jesús. ³ Nyoo javahá ra tsa ña cuvi javaha ley tsa tyaa ra Moisés. Ley tsa tyaa ra Moisés ña cunyeé tsi jandihí tsi cuhva iyó nyiví. Yacan cuenda Nyoo jaquitsí ra tsi Sehe ra. Cuví ra tumaa rayí ñuu ñayiví tan tyahví ra tsa cuenda cuatyí yo tyin tacan tan cundihí tsa javahá yo cuhva cuñí cuñu ñuhu yo. ⁴ Javahá ra tyehen tyin tacan tan cuví javaha yo cuhva catyí ley tan ñavin cuhva cuñí cuñu ñuhu yo tyin vityin iyó yo cuhva cuñí Tatyí Ii Nyoo.

⁵ Nyiví tsa iyó cuhva cuñí cuñu ñuhu, maa ñi cuhva cuñí cuñu ñuhu ñi tsicá iñi ñi, maa tyin nyiví tsa iyó cuhva cuñí Tatyí Ii Nyoo tsicá iñi ñi cuhva cuñí Tatyí Ii Nyoo. ⁶ Nyiví tsa tsicá iñi maa ñi maa

tsa cuñí cuñu ñuhu ñi, cua cunaa ñi. Maa tyin yoo tsa tsicá iñi cuhva cuñí Tatyí Ii ra, cua coo yo ñayivi tsa, tan cua coo tsa taxin aña yoo. ⁷ Nyivi tsa tsicá iñi cuhva cuñí cuñu ñuhu ñi, ñi xaan iñi tsi Nyoo cuví ñi can, tyin ña cuñí ñi javahá ñi cuhva catyí ley ra tan ndi ña cuví javaha ñi can. ⁸ Yacan cuenda nyivi tsa nducú tsa cuñí cuñu ñuhu ñi, ña cuví javaha ñi cuhva taahán iñi Nyoo.

⁹ Maa tyin nyooho ña iyó ca ndo cuhva cuñí cuñu ñuhu ndo, tyin iin ñi cuví ndo tsihin Tatyí Ii Nyoo, tun nditsa tsa iyó Tatyí Ii Nyoo aña ndo. Nyivi tsa nduve Tatyí Ii ra Cristo iyó aña, ñavin nyivi cuenda ra Cristo cuví ñi. ¹⁰ Maa tyin tun iyó ra Cristo aña ndo, nyitó aña ndo tyin janduvahá Nyoo tsi ndo nuu ra. Maa tyin cuñu ñuhu ndo tumaa tsa tsihi tsi jahá cuatyí. ¹¹ Nyoo janandoto ra tsi ra Jesús tsa yahá tsihi ra. Tan tacan tucu nyooho, tatun iyó Tatyí Ii ra aña ndo, cua janandoto ra cuñu ñuhu ndo tsihin Tatyí Ii ra tsa iyó aña ndo.

¹² Tan tacan yañi, nyaá javaha yo tsa javaha yo, maa tyin ñavin tsa javaha yo cuhva cuñí cuñu ñuhu yo. ¹³ Tyin tatun maa ñi maa cuhva cuñí cuñu ñuhu ndo iyó ndo, cua cunaa ndo nuu Nyoo. Maa tyin tatun tsihin Tatyí Ii Nyoo tan cuahán jandihí ndo tsa javahá ndo tsa caquiñi tsa cuñí cuñu ñuhu ndo, cua coo nyito ndo.

¹⁴ Tyin tandihí yoo tsa javahá cuhva jaquihín ityi Tatyí Ii Nyoo, sehe Nyoo cuví tsi yo. ¹⁵ Nyooho ña naquihín cuenda ndo Tatyí Ii Nyoo tsa cundaca ñaha tsi ndo tan cuví ndo tumaa musu. Tyin naquihín ndo Tatyí Ii Nyoo tsa tsahá tsa cuví ndo

sehe Nyoo. Tan juvin ñi Tatyí Ii Nyoo tsahá tsa cahan yo tyehen tsihin Nyoo: “Tyatya”. Yacan cuenda ña taahán tsi nayuhvi ndo. ¹⁶ Tan Tatyí Ii ra tsa naquihín yo ndu iin tsi tsihin tsa nyito yo tan jacotó tsi naha tsi tsi yo tyin cuví yo sehe Nyoo. ¹⁷ Tan tsa cuenda tsa cuví yo sehe ra, iyó ndatu tsi yo tsa naquihín yo tsa vaha tsa catyí Nyoo tyin cuhva ra tsi yo iin caa ñi tsihin ra Cristo. Tyin tun nyehé yo tundoho tumaa tsa nyehé ra Cristo tundoho, quívi cua tahan tsi, Nyoo cua jacahnu ra tsi yo iin caa ñi tsihin ra Cristo.

¹⁸ Tsitó yu tyin tundoho tsa nyehé yo vityin, luhlu cuii ñi cuví tsi tan ña cuví jandu inducu yo itsi tsihin tsa sii caá tsa cua nyehe yo quívi tahan tsi. ¹⁹ Nyoo cua janaha ra tandihí sehe ra tsi tandihí tsa javahá ra tyin ndatu tsi tan cuñí tsi naha tsi nyehe tsi naha tsi tsi nyívi cuví sehe ra. ²⁰ Tandihí tsa javahá ra, tsa iyó nu ñuhu ñayívi tan andívi, tsa tívi tsi. Vasu ña cuñí tsi tívi tsi, maa tyin Nyoo tsahá ra tsa tívi tsi tsa cuenda cuatyí tsa javahá nyívi. Maa tyin catyí ra tyin coo quívi cua ndutsaa nyico tsi. ²¹ Tandihí tsa javahá Nyoo tan cua ndutsaa tsi inga tsaha, cua quita nuña tsi tan ña cua tívi ca tsi, tyin cua nasama Nyoo cuhva caá tsi vityin. Tan sii xaan cua cuñí tsi iin caa ñi tsihin tandihí sehe Nyoo tyin ña cua tívi ca tsi. ²² Tsitó yo tyin tandihí tsa javahá Nyoo tan nyehé xaan tsi tundoho tumaa tsa nyehé ñaha ñuhú sehe tundoho tun cua cacu sehe ña. ²³ Tacan tucu yoó tsa naquihín cuenda Tatyí Ii tsa tsahá jihna ñi Nyoo tsi yo, nyehé ndihí yo tundoho, maa tyin tsa cuenda tsa cuñí yo tsa tahan ñi tsi quívi tsa nasama Nyoo cuhva iyó cuñu ñuhu yo tan nyehe tandihí tsa

javaha ra tyin cuví yo sehe ra. ²⁴ Vasu ndi maa ñaha ca ñihi yo tandihí can maa tyin tsitó yo tyin cua ñihi yo can tyin tsinú iñi yo. Tyin juvin ñi tsihin tsa tsinú iñi yo tan cacú yo. Tatun tsa nyehé yo tsa ndatú yo, nduve yahvi nyaá cuatu ca yo can tyin tsa iyó maa can tsi yo. ²⁵ Maa tyin ndita iñi yo tsa cua ñihi yo tsa ña nyehe yo, cuñí tsi tsa cunye e iñi yo cuatu yo can.

²⁶ Tan juvin ñi tacan jatyinyeé Tatyí Ii Nyoo tsi yo tun nduve tunyee iñi iyó tsi yo tan ña tsitó yo nácaa ndacan tahvi yo tsi Nyoo cuhva taahán maa tsi. Tatyí Ii tsa iyó añima yo tsicán tahvi tsi tsi Nyoo tsa cuenda yo tsihin tuhun tsa ña cutuñí iñi yo. ²⁷ Tsitó maa Nyoo náa iyó añima yo, tan tsitó ra náa tsicán Tatyí Ii ra, tsa cuenda yoo tsa cuví yo nyivi ra tyin tsicán tsi cuhva cuñí maa ra ndacan yo tsi ra.

Tsa cuenda ra Cristo tan cuví jaha canaayo siqui tundoho

²⁸ Tsitó yo tyin tandihí tundoho tsa nyehé nyivi tsa cuñí tsi Nyoo jatyinyeé can tsi ñi, tyin maa Nyoo cuví ra nacatsi tsi ñi, tumaa cuhva tyaa maa ra cuhva. ²⁹ Tyin nda quivi jihna ñi, tan tsa tsitó Nyoo yóo nyivi cua cunyicun tsi ra. Tan tyaa ra cuhva tyin cuvi ñi sehe ra tan coo ñi cuhva cuñí ra. Maa tyin ra Jesucristo cuví ra cua cuvi ra tsitsa tsa nuu tandihí ca yañi ra. Tan yañi ra cuví ñi yihí tuhun Nyoo. ³⁰ Tan ñi tsa tyaa Nyoo cuhva tyin cuvi ñi sehe ra, cana ra tsi ñi. Tan ñi tsa cana ra, naquihin cuenda ra tsi ñi tumaa tsatyin vaha ñi. Tan ñi tsa naquihin cuenda ra tsaha ra tsa cahnu cuvi ñi tsihin ra.

³¹ Yacan cuenda, ¿náa cua catyi yo? Tatun Nyoo tan nyaá ra tumañi ñni tsihin yo, ¿yóo cuví jaha canaa tsi yo? Yoñi. ³² Nyoo ña catyi ra tsa ña cua cuhva cuenda ra Sehe ra, tyin tsaha cuenda ra tsi ra tyin cúu ra tsa cuenda tandihi yo. Tun tacan tsaha ra Sehe ra tsa cuenda yo, ¿a ña cua cuhva ra tandihi ca tsa tsiñi ñuhu tsi yo? Cuhva ra. ³³ ¿Yóo cuví xico ñaha tsi yo tsa cuví yo nyivi nacatsi Nyoo? Yoñi. Tyin Nyoo tsa naquihin cuenda ra tsi yo tumaa tsatyin vaha yo. ³⁴ ¿Yóo cuví catyi tyin cuhun yo anyaya? Yoñi. Tyin ra Cristo tsa tsihi ra tsa cuenda cuatyí yo, tan nandoto ra tan vityin nyaá ra xiin cuaha Nyoo, tan tsicán tahvi ra tsi Nyoo tsa cuenda yo. ³⁵ Nduve náa cuví quihin nyaa tsa cuñi xaan ra Cristo tsi yo. ¿A cuví quihin nyaa tundoho itsi, a tsihi, a tsa caahán nyivi tsi yo tsa cuenda tuhun Nyoo, a tama, a tun nduve jahma yo, a tsa yuuhví, a tuhun tsiihi? Ndi intuhun tsehe tan ña cuvi quihin nyaa can tsa cuñi ra Cristo tsi yo. ³⁶ Tumaa catyi nu tutu Nyoo tyehen:

Jutu Mañi yu, tandihi ñi quivi tan cuñi nyivi cahñi ñi tsi ndi tsa cuenda un.

Tumaa javahá ñi tsihin mbee tsa cua cahñi ñi, tacan javahá ñi tsihin ndi, catyi tsi.

³⁷ Vasu ndi maa cuaha tundoho yahá yo, maa tyin tandihi ñi tsaha tsa nyehé yo tundoho tan jahá canaa yo, tyin ra tsa cuñi xaan tsi yo jatyinyeé tsi yo. ³⁸ Yacan cuenda tsitó vaha yo tyin nduve maa náa cuví quihin nyaa tsa cuñi xaan Nyoo tsi yo. Ndi tuhun tsiihi, ndi ñayivi iyó yo, ndi ángel, ndi tatyí ña vaha, ndi tsa cuví vityin, ndi tsa cua cuvi ityi nuu ca, ndi intuhun can tan ña cuvi jandusin

can tsi yo tsihin Nyoo. ³⁹ Ndi tsa iyó nu sucun, ndi tsa iyó nu cunu, ndi inga tsa javaha Nyoo, ña cuví jandusín can tsi yo tsihin Nyoo, ra tsa cuñí xaan tsi yo tsa cuenda ra Cristo Jesús Jutu Mañi yo.

9

Nyoo nacatsi ra tsi nyivi Israel

¹ Yuhu tsinú ñi yu tsi ra Cristo tan caahán yu tsa nditsa. Ña jandaví ñaha yu, tyin maa Tatyí Ii Nyoo jaquihín ityi tsa tsicá ñi yu. Yacan cuenda tsitó vaha yu tyin tsa nditsa caahán yu tun catyí yu ² cuihya xaan cuñí yu tan uhvi xaan cuñí añima yu ³ tsa cuenda nyivi ñuu yu, ñi Israel. Cuñí xaan yu tsi ñi. Tan nda cuanda cuhva yu tsa cunaa añima yu tan cuhun tsi nu uhvi nu nduve ra Cristo tun tsatyin cuví cacu ñi tsihin can. ⁴ Tata ra Israel cuví ñi. Tan Nyoo naquihín cuenda ra tsi ñi tumaa tsa sehe ra tsi ñi. Tan janaha ra tsa cahnu cuví ra tsi ñi, tyin tsinyaa ra tsihin ñi. Tan ndoo ra tuhun tsihin ñi, tan tsaha ra ley ra tsi ra Moisés na cuhva ra tsi ñi. Tan janaha ra tsi ñi nácaa cuñí ra tsa jacahnu ñi tsi ra. Tan catyí ra tsihin ñi nácaa cua javaha ra tsa vaha tsihin ñi nu cuahán ca tsi. ⁵ Tata tsii tsaahnu yo cuví tsi ñi, tan tacan tucu ra Cristo cuenda cuñu ñuhu ra. Ra ican cuví Nyoo. Tan juvin ra ndacá ñaha tandihí tsa iyó. ¡Na jacahnu yo tsi ra tacan ñi maa! ¡Tan na cuví tsi tacan ñi!

⁶ ¿A catyí yu tyin ña javaha Nyoo tumaa cuhva catyí ra tsihin nyivi Israel tahan tsanaha? Ñavin. Cuñí tsi coto yo tyin ña tandihí nyivi Israel tan cuví ñi nyivi Israel tsa nditsa. ⁷ Tan tacan tucu ña tandihí tata ra Abraham tan cuví ñi tata ra tsa

nditsa. Tyin tsa caḥan Nyoo tsihin ra, caḥan tsi tuhun intuhun ñi sehe ra. Tyin catyḯ Nyoo tsihin ra tyehen: “Tsa cuenda ra Isaac sehe un tan cua coo nyivḯ tata un.” ⁸ Tsehe janahá tsi yo tyin ñavin tsa cuenda tsa cuvḯ ñi nyivḯ tata ra Israel tan cuvḯ ñi nyivḯ Nyoo. Tyin nyivḯ tsa tsinú iñi tsa caḥan Nyoo tyin cua javaha ra, ñi ican cuvḯ sehe ra. Tumaa ra Abraham, tyin ra Abraham tsinḯ iñi ra tsa caḥan Nyoo tsihin ra ⁹ Tan tyehen caḥan Nyoo tsihin ra: “Tyembu vityin inga cuiya, cua quitsi nyico yu nu yucú ndo tan ña Sara tsa iyó iin sehe ña tacan”, catyḯ Nyoo tsihin ra.

¹⁰ Tan ñavin yacan ñi. Tyin caḥan ndihi tucu ra tuhun ra Esaú tan ra Jacob, sehe ña Rebeca, iin ñi jutu ra naha, ra cuvḯ tsii tsaahnu yo, ra Isaac. ¹¹⁻¹² Maa tyin tsa ndi cumañi ca cacu ra naha tan tsa ndi ñaha ca javaha ra naha tsa vaha, tan tsa ña vaha, catyḯ Nyoo tsihin ña Rebeca tyin ra Esaú, sehe nuu ña, cua cuvḯ ra musu ra tsa tsinu uvi. Javaha Nyoo tacan tyin nacatsí ra tsi nyivḯ tsa cuñí maa ra nacatsi ra, tan ñavin tsa cuenda tsa javahá ñi. ¹³ Tumaa catyḯ ra nu tutu ra tyehen: “Cuñí ca yu tsi ra Jacob, tan ñavin ca ra Esaú.”

¹⁴ ¿Tun tacan náa cua catyḯ yo? ¿A catyḯ yo tyin ña vaha tsa javahá Nyoo? ¡Ña cuvḯ! ¹⁵ Tyin catyḯ ra tsihin ra Moisés: “Cua cundaahvi iñi yu yóo nyivḯ cuñí maa yu cundaahvi iñi yu.” ¹⁶ Tacan javahá ra; cundaahví iñi ra tsi nyivḯ tsa cuñí maa ra cundaahví iñi ra. Tan ña cundaahví iñi ra tsi ñi tsa cuenda tsa javahá ñi tan ndi ñavin tsa cuenda tsa nducú ñi cuhva. Tyin maa ra cuvḯ ra cundaahvi iñi yóo cuñí maa ra. ¹⁷ Tumaa catyḯ nu tutu ra, nu caahán ra tyehen tsihin ra rey ñuhu Egipto: “Tsaḥa

yu tsa cuví un rey tyin tacan tan coto un tyin iyó tunyee iñi tsi yu. Tan nacoto tucu tandihí nyívi yóo ra cuví yuhu”, catyí Nyoo. ¹⁸ Tan tsihin tsehe tsitó yo tyin Nyoo cundaahví iñi ra tsi nyívi cuñí maa ra. Tan jandundavá tucu ra añima nyívi cuñí maa ra jandundavá ra añima.

¹⁹ Tan vasiqúi yooho cua catyi un: “Yoñi cuví javaha tsa cuñí maa ñi javaha ñi tun ña tsaha Nyoo tyin javaha ñi can.” ¿Nacuenda tyin tyaa Nyoo cuatyí siqúi ñi? ²⁰ Maa tyin ña vaha tun tsicá iñi un tacan. Tyin yoñi cuví catyi tyin ña vaha tsa javahá Nyoo. ¿Yóo ra cuví yooho tan nacahan un nu caahán Nyoo? ¿A cuví catyi iin quisi tsihin ra javahá itsi: “Ña taahán iñi yu cuhva javahá un tsi yu”? Ña cuví. ²¹ Tyin nyívi tsa javahá ndaha tyiñu, iyó ndatu tsi ñi tsa javaha ñi náa cuñí maa ñi tsihin ñuhu quisi can. Tan iin ñi ñuhu quisi can tsatyíñú ñi juvín ñi tsihin can javaha ñi quisi vaha tan quisi peehe.

²² Ña cuví catyi yo tyin ña vaha Nyoo tsa cuenda tsa tsatyíñú ra tsi nyívi tsa cua cuhun anyaya tan cunyeé iñi ra nyehé ra tsi ñi, tyin tsihin ñi can janahá ra tunyee iñi tsa iyó tsi ra tan janahá ra tyin cua tatsi tuñi ra tsi nyívi caquiñi. ²³ Javahá ra tacan tyin tacan tan coto yoo tsa cuví yo nyívi tsa cundaahví iñi ra tyin nda tsanaha tan tsa nacatsi maa ra tsi yo tyin cuhva ra tsa cahnu cuví ra tsi yo.

²⁴ Yacan cuenda nacatsi ra tsi yo. Tan yihí yo cuví yo nyívi Israel, tan nyívi tsa ñavin ñi Israel cuví.

²⁵ Tumaa catyí Nyoo nu tutu tsa tyaa ra Oseas:

Nyívi tsa ñavin nyívi ñuu yu cuví cua catyi yu tyin nyívi yu cuví ñi.

Ñi tsa ña cuñi yu, cua cuñi yu tsi ñi, catyí Nyoo.

²⁶ Tan nu catyi Nyoo: “Nyooho ñavin nyivi yu cuví ndo.” Juvín ñi ican cua catyi ra tsihin ñi: “Yuhu cuví Nyoo nyito, tan nyooho cuví sehe yu.”

²⁷ Maa tyin ra Isaías catyí ra tyehen tsa cuenda nyivi Israel: “Vasu ndi maa cuaha xaan nyivi tata ra Israel cua coo, tumaa tsa cuaha nyiti iyó yuhu ndutya ñuhu, juhva ñi ñi cua cacu. ²⁸ Tan tsa yatyin cuii cua jandaa Jutu Mañi yo tandihi tsa cahan ra tan cua tatsi tuñi ra tsi tandihi nyivi iyó nu ñuhu ñayivi.” ²⁹ Tumaa catyi tucu ra Isaías tahañ tsanaha:

Tun tsatyin Jutu Mañi yo, ra ndacá ñaha tandihi tsa iyó andivi, tan ña jacacu ra tsi juhva yo, tsa naa tandihi yo,

Tumaa naa nyivi ñuu Sodoma tan ñuu Gomorra tahañ tsanaha.

Nyivi Israel ña ñihí ñi cuhva nduvaha ñi nuu Nyoo,

³⁰ ¿Náa cua catyi yo? Nyivi tsa ñavin ñi Israel cuví, ña nducu ñi cuhva coo vaha ñi tsihin Nyoo, maa tyin Nyoo naquihin cuenda ra tsi ñi tumaa tsatyin vaha ñi tsa cuenda tsa tsinú iñi ñi tsi ra.

³¹ Tan nyivi Israel tsa nducú coo vaha tsihin Nyoo tsihin tsa javahá ñi cuhva catyí ley, ña cuví coo vaha ñi tsihin ra. ³² ¿Nacuenda? Tsa cuenda tyin cuñi ñi nduvaha ñi nuu Nyoo tsihin tsa javahá ñi, tan ñavin tsihin tsa tsinú iñi ñi tsi ra. Yacan cuenda tumaa tsa catyihí tsaha ñi yuu tan nduva ñi cuví can. ³³ Yuu can caahán Nyoo tuhun nu tutu ra tan catyí ra:

Tsaquín nyaa yu iin yuu nda ñuu Sión, tan janduvá tsi tsi nyívi.

Tan yuu can cuví ra Jesucristo.

Tan nyívi tsa tsinú iñi tsi ra tsa cuví yuu can, ña cua nduva ñi, catyí Nyoo nu tutu ra.

10

¹ Yañi, tsihin tsa ñi iñi aña yu tan tsicán tahvi yu tsa cuenda nyívi Israel tyin cuñi yu tsa cacu ñi.

² Tsandaa cuví yu tyin cuñi ñi jacahnú ñi tsi Nyoo, maa tyin ña ñihí ñi cuhva javahá ñi can. ³ Tyin ña tsitó ñi tyin juvin ñi maa Nyoo cuví ra janduvahá tsi nyívi nuu ra, tan tsa cuenda tsa ña tsitó ñi yacan, nducú ñi cuhva janduvaha ñi tsi ñi. Tan ña tsahá cuenda ñi tsi ñi tsi ra na janduvaha maa ra tsi ñi.

⁴ Tyin ra Cristo tsa quítsi ra tan javaha ra tandihí tsa catyí ley, tyin tacan tan tandihí nyívi tsa cua tsinu iñi tsi ra, naquihin cuenda Nyoo tsi ñi tumaa tsatyin vaha ñi.

⁵ Catyí ra Moisés tyin cuví nduvaha nyívi nuu Nyoo, tatun tyaá yahvi ñi tandihí tsa catyí ley, tyin tyaá ra tyehen: “Nyívi tsa tyaá yahvi tandihí tsa catyí ley, cua coo ñi ñayívi tsa ña cua naa maa.”

⁶ Maa tyin tsa cuenda tsa nduvahá yo nuu Nyoo tsihin tsa tsinú iñi yo tsi ra Cristo, catyí tutu ra tyehen: “Ña catyi un: ¿Yóo cundaa andívi? tyin tun cahan un tacan cuñi tsi catyi tyin januu un tsi ra Cristo nda nu ñuhu ñayívi tan jacacu ra tsi yo.” Ña cahan un tacan tyin ra Cristo tsa yaha quítsi ra. ⁷ Tan ndi ña catyi un: “Cuñi tsi tsa nuu iin ra nda nu yucú ndiyí tsitsi ñuhú tan janandoto ra tsi ra Cristo”. Ña cahan un tacan, tyin ra Cristo tsa

yaha nandoto ra. ⁸ Ña catyi un tacan tyin tyehen catyí nu tutu Nyoo: “Tuhun Nyoo yatyin iyó tsi tsihin ndo, iyó tsi yuhu ndo tan tsitsi añima ndo.” Tuhun ihya taahán tsi tsinu iñi ndo tyin juvin ñi tsi jacuahá tucu nyuhu. ⁹ Tatun catyi un tsihin yuhu un tyin ra Jesús cuví Jutu Mañi yo, tan tsinu iñi un tsihin añima un tyin Nyoo janandoto tsi ra tsa yaha tsihi ra, cua cacu un. ¹⁰ Tyin tsihin añima yo cuñí tsi tsinu iñi yo tsi ra Cristo tan cuvi nduvaha yo nuu Nyoo, tan tsihin yuhu yo cuñí tsi catyi yo tyin tsinú iñi yo, tyin tacan tan cacu yo. ¹¹ Tuhun Nyoo catyí tsi tyehen: “Ndi intuhun nyivi tsa tsinú iñi tsi ra tan ña cua tahan ñi ticanuu.” ¹² Tyin Nyoo inducu ñi cuñí ra nyehé ra tsi nyivi Israel tan nyivi inga ñuu. Tyin intuhun ñi maa ra ndacá ñaha tsi tandihi yo. Tan nasocó ra tsi tandihi nyivi tsa tsicán tahvi tsi ra. ¹³ Tyin tyehen catyí tuhun Nyoo: “Tandihi nyivi tsa tsicán tahvi tsi Jutu Mañi yo cua cacu ñi.” ¹⁴ Maa tyin ¿nácaa cua ndacan tahvi ñi tsi ra tatun ñaha ca tsinu iñi ñi tsi ra? Tan ¿nácaa cua tsinu iñi ñi tsi ra tatun ñaha ca cuñi ñi tuhun ra? Tan ¿nácaa cua cuñi ñi tuhun ra tatun yoñi cahan tuhun ra tsihin ñi? ¹⁵ Tan ¿nácaa cahun nyivi cahan ñi nácaa coo taxin nyivi, tatun yoñi jacuhun tsi ñi? Tumaa catyí nu tutu Nyoo: “Si xaan cuví nu tsaa ñi caahán tuhun vaha.” ¹⁶ Maa tyin ña tandihi nyivi tan tyaá yahvi ñi tuhun tsa jacacú Nyoo tsi yo. Tumaa catyi ra Isaías: “Jutu Mañi yu, yoñi cuñí tsinu iñi tuhun caahán ndi”, catyi ra. ¹⁷ Yacan cuenda cuñí tsi tsa tyaa soho jihna yo tuhun ra Cristo, tacan tan tsinu iñi yo tsi ra.

¹⁸ Maa tyin tsicá tucu iñi yu: ¿A ña tsiñi nyivi Israel tuhun Nyoo? ¡Tsiñi ñi! Tumaa catyí nu tutu

Nyoo:

Jutu Mañi yu, nyivi tsa jacotó tuhun un tsa jacoto ñi tuhun un nani cahnu nu ñuhu ñayivi, tan ña naco ihñi ñi ndi intuhun ñuu luhlu, catyí tsi nu tutu Nyoo.

¹⁹ Tan tsicá nyico tucu iñi yu: ¿A ña cutuñí iñi nyivi Israel tyin cua cacu nyivi tsa ñavin ñi Israel cuví? ¿Cutuñí iñi ñi! Tyin tsa jihna ñi ra Moisés tyaá ra tuhun cahan Nyoo tsihin ñi Israel nu tutu tyehen: Nyooho, ndasi cua cuñi ndo tyin cua kuhva yu tsa vaha tsi nyivi tsa ñavin nyivi ñuu yu cuví.

Tan cua cúu ndo tsihi nyehé ndo tsi ñi, catyí Nyoo.

²⁰ Tan ra Isaías cana iñi ra cahan ra:

“Nyivi tsa ña nanducu tsi Nyoo, nañihí ñi tsi ra.

Tan janaha ra tsi ra tsi ñi tsa ña tsicá tuhun tuhun ra.”

²¹ Tan tyaá tucu ra Isaías tuhun cahan Nyoo tsihin ñi Israel tyehen: “Tandihí ñi quivi cana yu tsi nyivi yu, na nacuhva cuenda ñi tsi ñi tsi yu, maa tyin ña tyaá yahvi ñi. Tan jandava xaan ñi iñi ñi”, catyí Nyoo.

11

Nyivi Israel tsa ñihí kuhva cacu

¹ ¿A ña cuñí ca Nyoo tsi nyivi Israel? Ñavin tsa ña cuñí ca ra tsi ñi, tyin juvin ñi ra Israel cuví tucu yuhu. Tyin tata ra Abraham tan tata ra Benjamín cuví yu. ² Tahan tsanaha nacatsi Nyoo tsi ñi Israel tyin cuví ñi nyivi ra. Tan vityin ñavin tsa jatsiyó cuí ra tsi ñi. ¿A ña ñuhú iñi ndo tyin catyí nu tutu Nyoo tyin ra Elías, ra cuví ndusu yuhu Nyoo, catyí ra tyin ña vaha nyivi Israel tan tsicán tahvi ra tsi Nyoo tyehen? ³ “Jutu Mañi yu, nyivi Israel tsahñi

ñi tsi ra cuví ndusu yuhu maa un naha ra, tan tsan̄i ñi nu jacahnú nyivi tsi un. Tan intuhun ña maa yu ndoo, tan cuñí ndih̄i ñi cahñi ñi tsi yu”, catyí ra. ⁴ Maa tyin nacahan Nyoo tan catyí ra tsihin ra Elías: “Ñavin maa ñi maa un ndoo. Tyin utsa mil ca nyivi naquih̄in vaha yu, ñi tsa ña jacahnú maa tsitoho Baal”, catyí Nyoo tsihin ra. ⁵ Tan juvin ñi tacan vityin, ndoo juhva nyivi jacahnú tsi Nyoo. Tan tsa cuenda tsa vaha Nyoo nacats̄i ra tsi ñi tyin jaha ra tucahnu iñi tsi ñi. ⁶ Tan ña jahá ra tucahnu iñi tsi yo tsa cuenda tsa javahá yo tsa vaha. Tyin tun tsatyin jahá Nyoo tucahnu iñi tsi yo tsa cuenda tsa javahá yo tsa vaha, cuñí tsi catyí tyin ña jacacú ra tsi yo tsihin tsa vaha ra.

⁷ Tan ¿nácaa? Nyivi Israel nduc̄u ñi cuhva nduvaha ñi nuu Nyoo, maa tyin ña ñih̄i ñi cuhva. Juhva ñi ñih̄i ñi cuhva. Tan ñi tsa ñih̄i cuhva can cuví ñi tsa nacats̄i maa Nyoo. Tan ñi tsa ña ñih̄i cuhva cacu, ndundavā añima ñi. ⁸ Tumaa catyí nu tutu Nyoo tyehen: “Nyoo tsah̄a ra tsa ña cutuñi iñi ñi. Tan vasu ndi maa iyó tinuu ñi, ña tsahá ra tsa nyehé ñi. Iyó soho ñi, maa tyin ña cutuñi iñi ñi tsa tsiñí ñi. Tacan iyó ñi nda cuanda vityin.” ⁹ Tan juvin ñi catyí tucu ra David tyehen:

Javahá ñi vico tan cus̄i iñi ñi, maa tyin yacan cua jativi tsi ñi.

Tan cua tatsi tuñi Nyoo tsi ñi tyin cuví can tumaa iin trampa tsa cuenda ñi.

¹⁰ Tan cua cuaa ñi na ña nyehe ca ñi tsa nditsa.

Tan nacosu tsa vee siqui ñi, catyí ra David tuhun nyivi Israel tsa ña tsinú iñi tsi Nyoo.

Nacaa nduvahá nyiví tsa ñavin ñi Israel cuví nuu Nyoo

¹¹ Tan vityin tsicá tuhun yu: ¿A tsa cuenda tsa ña tyaa yahvi nyiví Israel tsa cahan Nyoo, tan ndoó cuii ñi tsa ña cua cacu ñi? Ñavin tsa ndoo cuii ñi. Ndoó nuu ñi maa ñi, tyin jacacú jihna Nyoo tsi nyiví tsa ñavin ñi Israel cuví. Tyin tacan tan tsa cua nyehe ñi yacan, ndasi cuñi ñi tan natsinu ndihí iñi ñi tsi Nyoo. ¹² Tatun cuaha nyiví tsa ñavin ñi Israel cuví tan natsinu iñi ñi tsi Nyoo tsa cuenda cuatyí tsa javaha ñi Israel, cuaha ca ñi cua natsinu iñi quiví tsa cua cuví nyico tandihí nyiví Israel nyiví Nyoo.

¹³ Cuñí yu cahan yu juhva tsihin nyooho tsa ñavin ñi Israel cuví. Ra Jesús tava tyiñu ra tsi yu tsa quitsi yu nu iyó ndo. Tan tsitó yu tyin cuñí tsi tsa javaha yu tyiñu ihya tyin cahnu xaan cuví tsi. Cahnu jahá yu itsi ¹⁴ tan caahán yu tuhun Nyoo tsihin ndo tyin na nyehe nyiví ñuu yu, ñi Israel, nácaa tsinú iñi ndo tsi Nyoo, tyin vasiquí tacan tan natsinu ndihí iñi ñi tan cacu ñi. ¹⁵ Tyin tun tsa cuenda tsa ña natiñ cuenda Nyoo tsi nyiví Israel tan nduvahá iyó nyiví inga ñuu tsihin Nyoo, quiví cua naquihin cuenda ra tsi ñi cua cuví tsi tumaa tsa cua nandoto ñi, tyin cuaha ca ñi cua tsinu iñi tan ñavin ca tsa jihna ñi. ¹⁶ Iin cuhva tatun vaha quitá paan tsa javaha yo tsa jihna ñi tsihin yutsan paan, vaha tandihí ca yutsan can. Tan tatun iin yoho yutun tan vaha tun, vaha tandihí ca soco tun. Tacan tucu nyiví Israel nyaá yahvi ñi nuu Nyoo tyin tsii tsaahnu ñi yihí ra naha cuenda ra.

¹⁷ Tan nyiví Israel cuví ñi tumaa soco yutun olivo. Tan nyooho cuví ndo tumaa soco yutun

olivo cuuhu. Tumaa tuhvá nyívi tsaahnya iin soco yutun tan natyaā ñi inga soco yutun, tacan javahā Nyoo tyin jatsiyó ra tsi nyívi Israel tan tyaā ra tsi nyooho tsa cuví ndo nyívi inga ñuu. Tacan cuví tan tsā ndo cuví ndo nyívi cuenda Nyoo tan naquihín ndo tandihí tsa vaha tsa iyó tsi ra. ¹⁸ Maa tyin na ña cuñi ndo tyin vaha ca ndo tan ñavin ca ñi Israel tsa cuví soco yutun olivo vaha. Tatun tsicá iñi ndo tacan nducuhun iñi ndo tyin ñavin maa ndo nyisó yoho yutun can, tyin yoho yutun can nyisó tsi ndo.

¹⁹ Vasiqui cua catyí ndo: “Juvín, maa tyin Nyoo tsahnyā ra soco yutun can tan natyaa ra tsi nyuhu.” ²⁰ Nditisa. Maa tyin jatsiyó nuu ñi ra tsi nyívi Israel tsa cuenda tsa ña tsinú iñi ñi tsi ra. Tan tyacū ra tsi nyooho tsa cuenda tsa tsinú iñi ndo tsi ra. Yacan jahā ndo cuenda tsa ña nduyaa ndo tsihin can. ²¹ Tyin tatun ña jahá Nyoo tucahnu iñi tsi ñi tsa cuví soco vaha can, ndi nyooho tan ña cua jaha ra tucahnu iñi tatun ña tsinú vaha iñi ndo tsi ra. ²² Nyehe ndo tyin vaha xaan iñi Nyoo, maa tyin xaan tucu ra tsihin nyívi tsa ña naquihín cuenda tumañi iñi tsa tsahá ra tsi ñi. Vaha iñi ra tsihin nyooho yacan tyaa yahvi ndo tsa vaha tsa tsahá ra tsi yo. Tyin tatun ña tyaā yahvi ndo itsi, cua jatsiyó nyico ra tsi ndo tsaha yutun olivo ra. ²³ Tyin tatun natsinu nyico iñi nyívi Israel inga tsaha, cua cunyaa nyico ñi tsaha yutun olivo nu coyó ñi. Tyin Nyoo iyó tunyee iñi tsi ra tsa natyaa tahan nyico ra tsi ñi inga tsaha. ²⁴ Nyooho tsa ñavin Israel cuví, cuví ndo tumaa soco yutun olivo cuuhu, maa tyin Nyoo naquihín ra tsi ndo tan tyaā tahan ra tsi ndo tsihin yutun olivo vaha tsa cumí ra. Tacan cua javaha ra quívi cua cuñi ra iin yaha

ñi cua tyaa tahan nyico ra soco yutun vaha nu tsinyaꝯ jihna maa tsi.

Nyivi Israel cua cacu nda nu ndihi

²⁵ Yañi, cuñi yu tsa coto ndo iin tsa xeehe tsa javahá Nyoo, tyin tacan tan ña caca iñi ndo tyin tsitó xaan ndo. Cuaha xaan nyivi Israel ndundava añima ñi, nda cuanda cacu tandihi nyivi inga ñuu tsa nyaa tyin cacu. ²⁶ Tsa yaha cua cacu ñi, tacan tan cua cacu tandihi nyivi Israel tyin catyí nu tutu Nyoo tyehen:

Ra tsa jacacú tsi nyivi, nda Sión cua quee ra.

Tan cua quihin nyaa ra cuatyí nyivi ra Jacob.

²⁷ Tuhun ihya cuví tsa cua ndoo yu tsihin ñi quivi cua quihin nyaa yu cuatyí ñi, catyí Nyoo nu tutu ra.

²⁸ Cuxaán xaan nyivi Israel tsihin Nyoo tsa cuenda tuhun vaha ra Cristo tsa cacú yo. Tyin tacan tan cuví tsinu iñi nyooho. Tahan tsanaha nacatsi Nyoo tsi ra Abraham, tan ra Isaac, tan ra Jacob tyin tsinu iñi ra naha tsi ra. Tan cuñi ndihi ra tsi nyivi Israel tyin tata ra naha cuví tsi ñi. ²⁹ Tyin tsa tsa tsaha Nyoo, ña quihin nyaa nyico ra can. Tyin yoo tsa cuví nyivi Nyoo, ña tuhvá ra cahan tyin ñavin nyivi ra cuví yo. ³⁰ Tsanaha nyooho ña tyaꝯ yahvi ndo tsi Nyoo. Maa tyin vityin tyaꝯ yahvi ndo tsi ra tan cundaahví iñi ra nyehé ra tsi ndo tsa cuenda tsa ña tyaꝯ yahvi nyivi Israel tsi ra. ³¹ Nyivi Israel ña tyaꝯ yahvi ñi tsi Nyoo vityin tumaa tsa ña tyaꝯ yahvi nyooho tsi ra tahan tsanaha. Maa tyin cua cundaahví iñi ra nyehe ra tsi ñi tumaa tsa cundaahví iñi ra nyehé ra tsi nyooho. ³² Yihí tsaha tandihi nyivi tan nacoó ñi tsa

tyaá yahvi ñi tsi Nyoo. Tsahá ra ndatu tsi ñi tsa javahá ñi tacan, tyin tacan tan iin caa ñi cua cuvi cundaahvi iñi ra tsi tandihí yo.

³³ ¡Cahnu xaan cuví tsa cuca tan tsa tsitó Nyoo tan tsa tsiñí tuñi tsa iyó tsi ra! Yoo ña cuví nacatyí tuhun yo cuhva tsicá iñi ra, tan ndi iin sava quiví ña cua cutuñi iñi yo tandihí cuhva javahá ra.

³⁴ ¿Yóo cutuñi iñi cuhva tsicá iñi Jutu Mañi yo? ¿O yóo jacuahá tsi ra? Yoñi. ³⁵ Tyin yoñi cuví cuhva jihna iin tsa vaha tsi ra, tan tsa cuenda can tan cuita iñi ñi tyin cua naquihin ñi yahvi cuenda can.

³⁶ Tyin tandihí maa tsa iyó, maa Nyoo javaha itsi, tan iyó tsi tsa cuenda ra. ¡Na jacahnu yo tsi Nyoo tacan ñi maa! Tan na cuvi tsi tacan.

12

Na javaha yo cuhva cuñi Nyoo tsihin ñayivi iyó yo

¹ Yacan cuenda yañi, tsitó ndo tyin cundaahví xaan iñi Nyoo nyehé ra tsi yo, tan tsa cuenda yacan caahán ndaahvi yu tsihin ndo. Cuhva cuenda ndo cuñu ñuhu ndo tsi Nyoo, tan cuví tsi iin tsa nyito tsa jamañi ndo, tyin tsa javahá yo tacan janahá tsi tyin nditsa tsa jacahnú yo tsi ra. Yacan cuví tsa taahán iñi ra. ² Ña cōo ca ndo cuhva iyó nyivi ñuu ñayivi ihya. Cuhva ndo tsa nasama Nyoo cuhva tsicá iñi ndo, tan cuhva iyó ndo, tyin tacan tan coto ndo javaha ndo tsa taahán iñi maa ra: náa ndihí tsa vaha tan tsa cuiti.

³ Nyoo, tsa cuenda tsa vaha iñi ra, tan tava tyiñu ra tsi yu tyin cuvi yu iin ra caca tyiñu ra Jesucristo. Yacan cuenda catyí yu tsihin tandihí nyooho tyin ndi intuhun ndo tan ña caca iñi ndo tyin vaha

xaan ndo. Maa tyin caca iñi ndo nácaa iyó ndo tan náa cuví tsa vaha tsa tsaha Nyoo tsi ndo iin caa ñi tsihin tsa tsinú iñi ndo tsi ra. ⁴ Tumaa soho yo tan tinuu yo iin ñi cuví tsi tsihin tandihí ca tahan tsi tsa iyó iin cuñu ñuhu. Tan tsa intuhun intuhun tsi siin siin tyiñu javahá tsi. ⁵ Tacan tucu yoo, cuaha xaan yo maa tyin iin ñi cuñu ñuhu cuví yo tyin iin ñi cuví yo tsihin ra Cristo. Tan tsa tacan, iin ñi cuví tucu yo tsihin inga tahan yo tyin iin ñi cuñu ñuhu cuví yo.

⁶ Siin siin ndatu tsahá Nyoo tsi tsa intuhun intuhun yo, tsahá ra tsi yo ndáa tsa cuñí maa ra cuhva ra tsi yo, tan na cuatyíñu yo itsi. Tatun tsahá ra tsa cuví yo ndusu yuhu ra, na tsinu iñi yo tyin tyiñu can tsaha ra tsi yo, tan na javaha yo itsi. ⁷ Tatun tsahá ra ndatu tsi iin yo tsa jatyinyee yo tsi nyívi, na javaha yo itsi tsihin tsa ñi iñi añima yo. Tatun tsi inga yo tsahá ra tsa jacuahá yo tsi nyívi, na jacuaha yo tsi ñi tsihin tsa ñi iñi yo. ⁸ Tatun tsahá ra tsi inga yo tsa cuví jandu iin yo iñi nyívi, na jandu iin yo iñi ñi tsihin tsa ñi iñi añima yo. Tatun inga yo ñihí tsa jatyinyeé yo tsi nyívi tsihin xuhun, na jatyinyee yo tsi ñi, maa tyin ña cuita iñi yo tyin natyahví ñi tsi yo. Tatun inga yo ñihí tsa jaquihín ityi yo tsi nyívi yihí cuenda Nyoo tsihin yo, na jaha yo cuenda cuhva jaquihin ityi yo tsi ñi. Tatun inga yo ñihí tsa jatyinyeé yo tsi nyívi tsa iyó tsa tsiñí ñuhu, na jatyinyee yo tsi ñi tsihin tsa siin cuñí yo.

Náa taahán tsi javaha nyívi yihí cuenda ra Cristo

⁹ Cuñi tahan ndo tsi ndo tsihin tsa ñi iñi añima ndo. Ndasí cuñi ndo nyehé ndo tsa ña vaha. Tan

cuanyicun ndo tsa vaha. ¹⁰ Cuñí tsi tsa cuñi tahan yo tsi yo tumaa tsa cuñí yo tsi nyivi yo. Tan tyaa yahvi tahan ndo tsi ndo tan jaha tahan ndo tsa ñayivi tsi ndo.

¹¹ Ndücu ndo tunyee iñi tsa iyó tsi Nyoo. Ña utsan jaha ndo tsi ndo. Tan jaha tyiñu ndo tyiñu Jutu Mañi yo tsihin tsa ñi iñi añima ndo.

¹² Coo ndo ñayivi ihya tsihin tsa sii, tyin tsitó ndo tyin cua coo ndo tsihin Nyoo nu cuahán ca tsi. Janyee ndo iñi ndo nyehé ndo tundoho. Tan ndacan tahvi ndo tsi Nyoo iin nyita ñi.

¹³ Cuhva ndo tsa tsiñi ñuhu tsi nyivi yihí cuenda Nyoo tsihin ndo. Vaha tyanu ndo tsi nyivi tsaá vehe ndo.

¹⁴ Tatun caahán nyivi ndavaha ñi tsi ndo, vaha cahan ndo tsihin ñi, tan ña cahan ndasi ndo tsi ñi. Ndacan tahvi ndo tsi Nyoo tsa cuenda ñi, na nasoco ra tsi ñi.

¹⁵ Sii cuñi ndo tsihin nyivi sii cuñí. Vacu ndo tsihin nyivi tsa tsacú jahá tucuihya iñi.

¹⁶ Ña cañi tahan ndo. Iin ñi cuvi ndo tsihin tahan ndo. Ña cahnu jaha ndo tsi ndo; jandundaahvi ndo tsi ndo tumaa iyó nyivi ndaahvi; ña jaha ndo tsa tsitó xaan ndo.

¹⁷ Ña javaha ndo tsa ña vaha tsihin nyivi tsa javahá tsa ña vaha tsihin ndo. Jañiñi ndo tsi ndo tan javaha ndo tsa vaha tsihin tandihí nyivi.

¹⁸ Ndücu ndo cuhva coo taxin ndo tsihin tandihí nyivi. ¹⁹ Yañi, cuñí yu tsi ndo. Tatun javahá nyivi tsa ña vaha tsihin ndo, ña tatsi tuñi ndo tsi ñi; natyaa cuenda ndo tsi ñi ndaha Nyoo na tatsi tuñi maa ra tsi ñi. Tyin nu tutu ra catyí tsi tyehen: “Yuhu taahán tsi tatsi tuñi tsi nyivi tan tyahvi tsi

ñi”, catyí Jutu Mañi yo. ²⁰ Tan juvin ñi catyí tucu ra: “Tatun nyívi xaan iñi tsi ndo tan tsisocó ñi, cuhva ndo tsa catsi ñi, tan tatun na ityi iñi ñi, cuhva ndo ndutya coho ñi. Tyin tsa javaha ndo tacan, cuaaha tacan ña nuu ñi cua cuví, tyin cua nducahan nuu ñi.” ²¹ Ña cuhva ndo tsa cundaca ñaha tsa ña vaha tsi ndo, maa tyin jandu iin ndo iñi añima ndo. Javaha ndo tsa vaha tan çasi ndo nu vatsí tsa ña vaha tsihin can.

13

¹ Tandihí nyívi cuñí tsi tsa tyaa yahvi ñi tsi ra cumi tyiñu cuenda ra ndacá ñaha naha ra. Tyin tandihí maa ra cumí tyiñu tan Nyoo tsahá tyiñu can tsi ra naha. Ra cumí tyiñu tsa iyó, maa Nyoo tsahá tsi ra naha tsa cuví ra naha tyiñu. ² Yacan cuenda, nyívi tsa ña tyaá yahvi tsi ra naha, cuñí tsi catyi tyin ña tyaá yahvi ñi tsa caahán Nyoo. Ñi tsa javahá tacan, tsicoo cuatyí ñi tsa cuenda can, tan cua cutuñi ñi. ³ Tyin ra ndacá ñaha naha ra, ña nyisó tyiñu ra naha tsa jayuhvi ra naha tsi nyívi tsa javahá tsa vaha. Nyisó tyiñu ra naha tsa tatsi tuñi ra naha tsi nyívi tsa javahá tsa ña vaha. Tun ña cuñí un tsa jayuhvi ra cumi tyiñu naha ra tsi un, çoo vaha, tyin tacan tan cua nyehe ra naha tyin vaha iyó un tan vaha nyívi cuví un. ⁴ Tyin ra cumí tyiñu naha ra iyó ra naha tsa javahá ra naha tyiñu Nyoo tsa cuenda tsa vaha tsi maa yo. Maa tyin tatun ña catsi iyó un, yacan nditsa cuvi nayuhvi un tsi ra naha. Tyin ñavin nyecú taxin ñi maa ra naha vehe tyiñu. Nyecú ra naha tsa tatsi tuñi ra naha tsi nyívi javahá tsa ña vaha, tyin tyiñu can tyaá Nyoo tsi ra naha. ⁵ Yacan cuenda ñiñi cuñí

tsi tsa tyaa yahvi ndo tsi ra cumí tyiñu naha ra, ñavin ñi tsa cuenda tsa cuví tatsi tuñi ra naha tsi ndo, maa tyin tsa cuenda tyin tsitó ndo tyin tacan taahán tsi javaha ndo. ⁶Tan inga tuhun tsa cuenda can tyahví ndo xuhun tsa tavá ra cumí tyiñu naha ra tsa cuenda tsa janduvahá ra naha ñuu ndo. Jahá tyiñu ra naha tyiñu Nyoo, tyin yacan tyiñu nyecú ra naha.

⁷Cuhva ndo tsa taahán tsi tsi intuhun intuhun nyivi. Tyahvi ndo náa taahán tsi tyahvi ndo tsa cuenda tsa vaha tsi ñuu ndo. Tyaa yahvi ndo tsi nyivi tsa taahán tsi tyaa yahvi ndo. Jaha ndo tsa ñayivi tsi nyivi tsa taahán tsi jaha ndo tsa ñayivi tsi. ⁸Ña cunyaa cuenda ndo tsi ndi intuhun nyivi. Maa tyin cuñi tahan ndo tsi ndo, tyin tsa cuñi tahan yo tsi yo, javahá yo tandihi tsa catyí ley Nyoo tsa tyaa ra Moisés tyin javaha yo. ⁹Catyí ley Nyoo tyehen: “Tun iyó ñasihhi ndo o yhi ndo ña coo inga ñaha o rayhi tsi ndo. Ña cahñi ndo. Ña suhu ndo. Ña cahan ndo cuendu siqui ndi intuhun nyivi. Ña nyiyo iñi ndo tsa tsii inga nyivi.” Tandihi tsehe tan inga ca ley javahá ndo itsi tatun cuñi ndo tsi tahan ndo tumaa tsa cuñi ndo tsi maa ndo. ¹⁰Tatun cuñi ndo tsi tahan ndo, ña javaha ndo tsa ña vaha tsihin ñi. Tsihin tsa cuñi tahan yo tsi yo, javahá yo tandihi tsa catyí ley Nyoo tsa tyaa ra Moisés.

¹¹Tsihin tuhun ihya jaha ndo cuenda tsi ndo quivi iyó ndo vityin. Tyin tsa tahañ tsi cuhva tsa taahán tsi ndoto yo. Tyin vityin tsa yatyin cuii ca cua cunuhu añima yo nu nyaá Nyoo tan ñavin ca quivi tsa quihvi yo tuhun ra. ¹²Tsa yahá tsa tsacuaa, tan tsa cua tuvi. Yacan cuenda cuñi tsi jandihhi ndo tsa javahá ndo tsa javahá nyivi iyó nu

naa. Tan jaha tyiñu ndo tsihin tsa vaha tsa tsaha Nyoo tsi ndo; javaha ndo cuhva javahá nyivi iyó nu nditsin. ¹³ Cuñí tsi cuiti coo yo tyin nu nditsin Nyoo iyó yo. Tan ña coho ndo nyixi, ña javaha ndo vico tan coho ndo nyixi. Nyooho rayi, ña caca nuu ndo tsihin ñaha. Tan nyooho ñaha ña caca nuu ndo tsihin rayi. Ña coo viciu tsi ndo. Tan ña ndasi cuñi ndo nyehe ndo tsi nyivi. Tan ña nyiyo iñi ndo tsa iyó tsi ñi. ¹⁴ Maa tyin coo ndo tsihin Jutu Mañi yo Jesucristo, tumaa tsinditsí yo jahma tacan na cunditsi yo tsi ra. Tan ña caca iñi ndo javaha ndo cuhva cuñi cuñu ñuhu ndo.

14

Na ña cahan nyaa yo tsi nyivi

¹ Tatun iin nyivi yihí cuenda Nyoo tan luxu ñi tsinú iñi ñi tsi ra, ña vaha tsa ña naquihin cuenda ndo tsi ñi. Naquihin cuenda ndo tsi ñi, maa tyin ña cahan ndo tsa luxu tuhun Nyoo tsa ña cutuñi vaha iñi yo tsihin ñi coto ndu uvi iñi ñi. ² Cua cuhva yu iin cuhva tsi ndo: Tsa cuenda juhva nyivi cuví catsi maa ñi tandihí maa nuu tsa iyó. Tan tsa cuenda tucu inga ñi, maa ñi maa yucu cuví catsi ñi, cuñi ñi. Ñi ihya cuví ñi tsa ña ñihi vaha nyaá tsihin Nyoo. ³ Maa tyin ñi tsa tsatsí tandihí can, taahán tsi naquihin cuenda ñi tsi ñi tsa tsatsí yucu ñi. Tan ñi tsa tsatsí yucu, na ña cahan nyaa ñi tsi inga ñi can. Tyin Nyoo naquihín cuenda ra tsi ñi can. ⁴ Tan ¿yóo nyivi cuví yooho tan cahan nyaa un tsi musu inga ra? Tyin tun vaha o ña vaha javahá ñi, nyehe maa tsitoho ñi tsihin ñi. Tan vaha cua quita ñi tyin Jutu

Mañi yo, iyó tunyee iñi tsi ra tan cua jatyinyee ra tsi ñi na quita vaha ñi.

⁵ Inga tucu cuhva: Yihí nyivi jacahnú ñi iin quivi tan ñavin ca inga quivi. Tan tsa cuenda inga nyivi nduve quivi cahnu cuví tan quivi ña cahnu cuví. Inducu ñi quivi cuñí ñi, yacan cuenda intuhun intuhun maa yo tan cuñí tsi tyihi tuñi vaha iñi yo.

⁶ Ñi tsa naquihín vaha quivi, naquihín vaha ñi can tsa cuenda tsa jacahnú ñi tsi Jutu Mañi yo. Ñi tsa ña naquihín vaha can, juvin ñi jacahnú tucu ñi tsi Nyoo tyin ña naquihín vaha ñi can. Tan ñi tsa tsatsí tandihi can, juvin ñi tsatsí tucu ñi tsa cuenda tsa jacahnú ñi tsi Jutu Mañi yo, tan nacuhvá ñi tyahvi nyoo tsi ra tyin tsaha ra tsa catsi ñi. Tan ñi tsa ña tsatsí tandihi, ña tsatsí ñi tsa cuenda tsa jacahnú ñi tsi Jutu Mañi yo tan juvin ñi nacuhvá tucu ñi can tyahvi nyoo tsi ra.

⁷ Tyin ndi intuhun yo tan ña iyó yo tsihin tunyee iñi maa yo. Tan ndi ñavin tsa cuenda maa yo tsihi yo. ⁸ Tyin tatun iyó yo, iyó yo tsa jaha tyiñu yo tyiñu Nyoo. Tan tatun tsihi yo, tsihi yo tsa cuenda Jutu Mañi yo tan naquihín ra aña yo. Yacan cuenda tsii maa Jutu Mañi yo cuví tsi yo vasu ndi maa nyito yo o tsihi yo. ⁹ Tyin ra Cristo tsihi ra tan nandoto ra tyin cundaca ñaha ra tsi nyivi nyito tan nyivi ña nyito.

¹⁰ Maa tyin yooho, ¿nacuenda nyehé nyaa un tsi ra yañi un? ¿O nacuenda ña naquihin cuenda un tsi ra?, tan tsitó vaha un tyin tandihi yo tan cua tahan tsi quivi cuhva cuenda yo tsi yo nuu ra Cristo tyin tatsi tuñi ra tsi yo. ¹¹ Tumaa tsa catyí Nyoo nu tutu ra tyehen:

Yuhu nditsa tsa nyito yu. Tan tumaa tsa nditsa tsa nyito yu, tacan nditsa tsa cuñí tsi cuiñi tsiti tandihi nyivi nuu yu.

Tandihí ñi tan cua nacoto ñi tsi yu tsa cuví yu Nyoo. Tan nuu tandihí nyivi cua jacahnu ñi tsi yu, catyí Nyoo.

¹² Yacan cuenda intuhun intuhun yo tan cua nacuhva cuenda yo tyiñu javahá yo tsi Nyoo.

Ña janacava ndo tsi yañi ndo nu cuatyí

¹³ Yacan cuenda, ña taahán tsi cahan nyaa ca ndo tsi nyivi. Maa tyin nducu ndo cuhva tsa ña janacava ndo tsi ñi nu cuatyí coto jandihí ñi tsa tsinú iñi ñi tsi ra Cristo. ¹⁴ Yuhu tsitó yu tyin cuví catsi yo tandihí tyin tsinú vaha iñi yu tsi Jutu Mañi yo Jesucristo, tan maa ra jacuahá tsi yu. Maa tyin ñi tsa tsicá iñi tyin ña cuví catsi ñi tandihí, tsa cuenda maa ñi ña cuví catsi ñi can. ¹⁵ Maa tyin tatun tsa cuenda tsa tsatsí ndo tan ndasi cuñí yañi yo, ña nditsa tsa cuñí ndo tsi ra. Ña cuhva ndo tsa tiví yañi yo tsihin tsa tsatsí ndo tyin ra Cristo tsihi ra tsa cuenda ra. ¹⁶ Ña cuhva ndo tsa cahan nyivi ndavaha ñi siqui tsa tsahá Nyoo ndatu tyin catsi yo. ¹⁷ Tatun ndacá ñaha Nyoo tsi yo ña ñiñi xaan náa tsatsí yo o náa tsihí yo. Tsa ñiñi ca cuví tsa vaha iyó yo nuu ra, tan tsihin tsa sii cuñí yo, tan taxin iyó aña yu jahá Tatyí li ra. ¹⁸ Nyivi jahá tyiñu tyiñu ra Cristo tacan, sii cuñí Nyoo nyehé ra tsi ñi, tan tacan tucu nyivi sii cuñí ñi nyehé ñi tsi ñi.

¹⁹ Yacan cuenda cuñí tsi jañiñi yo tsi yo tan coo vaha yo tsihin nyivi. Tyin tacan tan cuví jatyinyee tahan yo tsi yo na cuahnu ca yo tsihin tuhun Nyoo.

²⁰ Ndi intuhun ndo tan ña jativi ndo tyiñu jahá

Nyoo tsitsi añima inga nyivi tsihin tsa tsatsí ndo. Nditsa tyin tandihi tsa tsatsí yo tan vaha tsi. Maa tyin ña vaha tsa catsi yo iin tsa tsatsí yo tatun tsihin can janacava yo tsi nyivi nu cuatyí. ²¹ Yacan cuenda, vaha tsa ña catsi yo cuñu, ndi ña coho yo vinu tatun ndasi cuñi yañi yo nyehe ra tyin javahá yo can. Na ña janacava yo tsi ra yañi yo nu cuatyí. Na ña casi yo nu tsinú iñi ra tsi Nyoo tsihin iin tsa javahá yo. ²² Cuhva tsa tsinú iñi yo tsa cuenda tandihi yacan ña çahan yo tuhun can tsihin inga nyivi. Na coto intuhun ñi maa yo can tsihin Nyoo. Sii xaan cuñí yo tatun ña uvi tsicá iñi yo javahá yo tsa tsahá Nyoo ndatu tyin javahá yo. ²³ Maa tyin nyivi tsa tsatsí náa tsatsí, tan uvi tsicá iñi ñi, tsicoo cuatyí ñi tyin ña tsinú vaha iñi ñi tyin cuví catsi ñi can. Tan tandihi tsa javahá yo tsihin tsa ña tsiñú iñi yo tyin tsahá Nyoo ndatu javaha yo can, cuatyí cuví.

15

Na javaha yo tsa taahán iñi nyivi yihí tuhun Nyoo tsihin yo, tan ñavin tsa taahán iñi ñi maa yo

¹ Yoo tsa vaha cuanyicún tsi Nyoo, cuñí tsi tsa jatyinyee yo tsi nyivi tsa ñaha ca tsinú vaha iñi tsi ra. Jatyinyee yo tsi ñi na tsinu ca iñi ñi. Tan na ña nducu yo maa ñi maa tsa taahán iñi maa yo. ² Intuhun intuhun yo cuñí tsi tsa javaha yo cuhva taahán iñi inga nyivi tatun cuví tsi tsa vaha cuenda ñi, tyin tacan tan cuví cuahnu ca ñi tsihin tuhun Nyoo. ³ Tyin ndi ra Cristo tan ña javahá ra cuhva taahán iñi maa ra, maa tyin tahán ra tumaa catyí nu tutu Nyoo tyehen: “Tandihi tsa ndavaha ñi tsa

cahan nyivi siqui Nyoo, siqui ra Cristo ndoo can”, catyí tsi. ⁴ Tyin tandihí tsa tsinyaa nu tutu Nyoo tahan tsanaha, tsinyaa tsi tsa cuenda tsa cutuhva yo itsi. Tan juvin tsi jatyinyee tsi yo tsa cunyeé iñi yo cuatu yo tsa cua kuhva Nyoo tsi yo. Tyin tun cahvi yo itsi jandu iin tsi iñi yo. ⁵ Tan juvin ñi maa ra tsahá tsa cunyeé iñi yo cuatu yo, tan tsahá ra tsa vaha cuñi añaima yo. Na jatyinyee ca ra tsi yo coo vaha yo tan iin ñi cuvi yo tumaa taahán iñi ra Cristo Jesús. ⁶ Tacan tan tandihí yo iin caa ñi jacahnu yo tsi Nyoo Jutu ra Jesucristo Jutu Mañi yo.

Nyivi tsa ñavin ñi Israel cuví, cua coto ñi tuhun Nyoo

⁷ Yacan cuenda naquihin cuenda tahan ndo tsi ndo, tumaa naquihín cuenda ra Cristo tsi yo, tyin tun javaha yo tacan, jacahnu yo tsi Nyoo. ⁸ Tan catyí yu tsihin ndo: ra Cristo quitsí ra quitsí jatyinyee ra tsi nyuhu tsa cuví nyivi Israel, tyin tacan catyí Nyoo tsihin tsii tsaahnu ndi tyin cua javaha ra. Tan tacan janaha ra Cristo tyin tandihí tsa catyí Nyoo tyin cua javaha ra, javahá ra itsi. ⁹ Quitsí ra Cristo tyin tacan tan jacahnu tucu nyivi tsa ñavin ñi Israel cuví tsi Nyoo, tsa cuenda tsa cundaahví iñi ra nyehe ra tsi ñi, tumaa catyí nu tutu ra tyehen:

Yacan cuenda cua jacahnu yu tsi un tan cua nyehe tandihí nyivi tsa ñavin ñi Israel cuví.

Cua jacahnu yu tsi un tan cata yu yaa tsa cuenda un, catyí tsi.

¹⁰ Tan inga tucu nu catyí tsi tyehen:

Nyooho tsa ñavin ñi Israel cuví, sîi cuñi ndo tsihin ñi Israel, nyivi Nyoo.

¹¹ Tan inga tucu nu catyí tsi tyehen:

Jacahnu ndo tsi Jutu Mañi yo, nyooho nyivi tsa ñavin ñi Israel cuví.

Çata tandihî ndo yaa tan jacahnu ndo tsi ra.

¹² Ra Isaías tyaa tucu ra nu tutu Nyoo tyehen:

Cua cacu iin ra tsa cuví tata ra Isaí.

Cua quitsi ra cua cundaca ñaha ra tsi nyivi tsa ñavin ñi Israel cuví.

Tan cua cuita iñi ñi tyin cua jacacu ra tsi ñi.

¹³ Juvín ñi maa Nyoo tsahá tunyee iñi tsi yo tan tsitó yo tyin cua cuhva ra tsa cuhva ra tsi yo. Na jacutu ra tsi ndo tsihin tusîi iñi ra. Tan na coo taxin añima ndo tsa cuenda tsa tsinú iñi ndo tsi ra, tyin tacan tan tsihin tunyee iñi Tatyí Ii ra tan cuita vaha iñi ndo tyin cua ñihi ndo tsa cua cuhva ra tsi ndo.

¹⁴ Yañi, tsitó vaha yu tyin nyooho vaha iñi ndo tan cutuñí vaha iñi ndo, tan tsitó vaha ndo cuhva cuhva cuenda tahan ndo tsi ndo. ¹⁵ Maa tyin nu carta ihya ñihi xaan caahán yu sîqui juhva tsa tyaa yu tyin tacan tan ña naa iñi ndo can. Tyehen javahá yu tsa cuenda tyin Nyoo tsahá ra tsa vaha ra tsi yu ¹⁶ tsa jaha tyiñu yu tyiñu ra Jesucristo nu iyó nyivi tsa ñavin ñi Israel cuví. Tan tyiñu tsa javahá yu cuví tsa caahán yu tuhun Nyoo nácaa jacacú ra tsi nyivi. Tyehen javahá yu tyin tacan tan cuví cuhva cuenda yu tsi ñi tsi Nyoo tan cuví ñi iin ofrenda tsa taahán iñi ra, tyin tsa nduvahá ñi nuu ra jahá Tatyí Ii ra.

¹⁷ Yuhu tsa tsinú iñi yu tsi ra Cristo Jesús, sîi cuñí yu jahá tyiñu yu tyiñu Nyoo tyin tsitó yu tyin tyiñu vaha javahá yu. ¹⁸ Yuhu ña caná iñi yu cahan yu

tsa ña javaha ra Cristo tsihin yu. Maa tyin tsahá cuenda yu tsi ndo tyin nyivi tsa ñavin ñi Israel cuví, tsinú iñi ñi tsi Nyoo tyin Nyoo tsatyíñu ra tsi yu tan vityin tyaá yahvi ñi tsi ra tsa cuenda tsa tsinú iñi ñi tuhun cahān yu tan nyehe ñi tsa javaha yu ¹⁹ tsihin tunyee iñi seña tan tsa iyo tsa javaha yu jaha Tatyí Ii Nyoo. Tsihin tandihi yacan cunyeē cahān yu tuhun ra Cristo tan nácaa jacacú ra tsi yo tsihin nyivi. Quitsaha yu nda Jerusalén tan inga ca ñuu nda cuanda tsaā yu ñuu tsa cayucú Ilírico. ²⁰ Tacan nducú yu cuhva caahán yu tsa jacacú ra Cristo tsi yo nu ñaha ca coto nyivi tuhun ra, tyin ña cuñí yu jaha tyiñu yu nu tsa yaha cahān inga ra tuhun ra Cristo. ²¹ Tumaa catyí nu tutu Nyoo tyehen:

Nu nduve maa tuhun Nyoo iyó, cua tsaā tuhun Nyoo tan cua cutuñi iñi nyivi iyó can itsi, catyí tsi.

Nu tyaá ra Pablo cuhva tyin cuhun ra ñuu Roma

²² Yacan cuenda ña cuví quitsi yu quitsi nyehe yu nu yucú ndo, vasu ndi maa cuaha xaan tsaha cuñi yu quitsi yu. ²³ Maa tyin vityin tsa ndihí jaha tyiñu yu ityi ñuu ihya. Tan tsa cuaha xaan cuiya cuñi yu quitsi yu nu yucú ndo tan ndoo yu juhva quivi tsihin ndo. ²⁴ Nyehe jihna yo tatun cuvi yaha yu nu yucú ndo quivi cua cuhun yu España. Tsa yaha tsa cunyi yu juhva quivi tsihin ndo, nyehe yo tatun cuvi jatyinyee ndo tsi yu tan tsaā yu nu cuhun yu. ²⁵ Maa tyin vityin cuahán yu ñuu Jerusalén tan nyisó yu ofrenda tsa cuenda nyivi yihí cuenda ra Cristo tsa iyó ndacan. ²⁶ Tyin nyivi tsicá vehe ñuhu tsa iyó ityi Macedonia tan ityi

Acaya natuhun tahan ñi tan tava ñi juhva xuhun jacuhun ñi tsi nyivi ndaahvi tsa iyó Jerusalén, ñi yihí cuenda ra Cristo. ²⁷ Tyehen cuñi ñi javaha ñi. Tan nditsa tyin taahán tsi javaha ñi tacan. Tyin nyivi Israel, ñi tsinú iñi tsi ra Cristo, tsaḥa ñi tuhun ra Cristo tsi ñi. Yacan cuenda taahán tucu tsi tsi maa ñi tsa jatyinyee ñi tsi ñi Israel tsihin tsa iyó tsi ñi. ²⁸ Yacan cuenda, tatun tsa yaha jandaa yu tyiñu ihya, tan tsa yaha nacuhva cuenda yu xuhun ihya tsi nyivi Jerusalén, tacan tan cuhun yu nda España tan cua yaha yu nu yucú ndo. ²⁹ Tsitó vaha yu tyin quivi cua quitsi yu nu yucú ndo, cuaha tsa vaha cua cuhva Nyoo tsi yu tyin nacuhva cuenda yu tsi ndo.

³⁰ Yañi, Tatyí Ii Nyoo tsaḥa tsa cuñi ndo tsi yu tan tsi ra Jesucristo, yacan cuenda caahán ndaahvi yu tsihin ndo ndacan tahvi ndo tsi Nyoo tsa cuenda yu tan tsa cuenda tyiñu jahá yu. ³¹ Ndacan tahvi ndo tsa cuenda yu, na jacacu Nyoo tsi yu ndaha nyivi Judea tsa ña tsinú iñi tsi ra Cristo. Tan ndacan tahvi ndo tsa cuenda nyivi yihí cuenda ra Cristo ñuu Jerusalén, na tin cuenda vaha ñi ofrenda tsa ndahá yu. ³² Tan ndacan tahvi ndo na cuvi cuhva cuñi Nyoo tan cuvi quitsi yu quitsi nyehe yu nu yucú ndo tsihin tsa siñ cuñi yu tan cuvi quitatu vaha yu. ³³ Tan Nyoo, ra tsaḥa tsa taxin coo añima yo, na cunyaa ra tsihin tandihí ndo. Tan na cuvi tsi tacan.

16

Nu tsaḥa ra Pablo nacumi tsi nyivi vaha iñi tsi ra

¹ Jacotó yu tsi ndo tyin ña hermana Febe jatyinyeé xaan ña tsi nyivi yihí cuenda Nyoo ñuu

Cencrea. ² Naquihin vaha ndo tsi ña tumaa naquihín Jutu Mañi yo tsi yo, tumaa taahán tsi javaha ñi yihí cuenda Nyoo. Jatyinyee ndo tsi ña tsihin tandihí tsa tsiñí ñuhu tsi ña, tyin maa ña cuaha xaan nyivi jatyinyeé ña, tan nda cuanda maa yu.

³ Cuhva ndo nacumi tsi ña Priscila tan tsi ra Aquila, ñi tsa cutahan tsihin yu nu jahá tyiñu yu cuenda ra Cristo Jesús. ⁴ Tsahnya iñi ñi ñayivi ñi quivi jacacu ñi tsi yu. Yacan cuenda tsahá yu tyahvi nyoo tsi ñi. Tan ñavin yuhu ñi, tyin tandihí tucu nyivi tsa ñavin ñi Israel cuví, ñi tsa yihí cuenda Nyoo, tsahá ñi tyahvi nyoo tsi ñi. ⁵ Cuhva tucu ndo nacumi tsi ñi yihí cuenda Nyoo tsa ndú iin vehe ña Priscila tan ra Aquila. Vatsí tucu nacumi tsi ra Epeneto, yañi yu. Juvín ra cuví ra tsa tsinü jihna iñi tsi ra Cristo ityi Acaya. ⁶ Cuhva ndo nacumi tsi ña María. Jahá tyiñu xaan ña nu yucú ndo. ⁷ Cuhva ndo nacumi tsi nyivi ñuu yu, ra Andrónico tan ra Junias, ra yañi yu tsa tsiyucu tsihin yu vehe caa. Cahnu tyiñu jahá tyiñú ra naha cuenda Jutu Mañi yo tsihin tandihí ca ra jahá tyiñu cuenda Nyoo. Tan jihna ca ra naha natsinü iñi tsi ra Cristo tan ñavin ca yuhu.

⁸ Cuhva ndo nacumi tsi ra Amplias ra vaha iñi tsi yu cuenda Jutu Mañi yo. ⁹ Cuhva ndo nacumi tsi ra Urbano, ra yañi yo cuenda tyiñu ra Cristo Jesús, tan tacan tucu ra Estaquis, ra yañi yu. ¹⁰ Cuhva ndo nacumi tsi ra Apeles. Nyehé yo tyin nditsa tsa tsinú iñi ra tsi ra Cristo. Tan tsahá tucu yu nacumi tsi nyivi ra Aristóbulo. ¹¹ Cuhva ndo nacumi tsi ra Herodión ñuu yu tan tsi nyivi ra Narciso, ñi

tsa tsinú iñi tsi Jutu Mañi yo. ¹² Vatsí nacumi tsi ña Trifena tan tsi ña Trifosa, ñi tsa jahá tyiñu tyiñu Jutu Mañi yo. Tan ña hermana Pérsida, ñaha tsa jahá tyiñu xaan tyiñu Jutu Mañi yo. ¹³ Cuhva ndo nacumi tsi ra Rufo, iin ra cahnu cuví nuu Nyoo. Tsinú vaha iñi ra tsi Jutu Mañi yo. Tan vatsí tucu nacumi tsi sihi ra, ña tsa cuví tumaa sihi yu. ¹⁴ Cuhva ndo nacumi tsi ra Asíncrito, tsi ra Flegonte tan tsi ra Hermas, tan tsi ra Patrobas, tan tsi ra Hermes, tan tsi ra hermano tsa yucú tsihin ra naha. ¹⁵ Cuhva tucu ndo nacumi tsi ra Filólogo tan tsi ña Julia tan tsi ra Nereo tsihin cuhva ra, tan tsi ra Olimpas tan tsi tandihi ñi yihí cuenda Nyoo tsa yucú tsihin ñi.

¹⁶ Cuhva tahan ndo nacumi tsi ndo. Tandihi nyivi yihí cuenda ra Cristo tsa iyó ityi ihya jaquitsi ñi nacumi tsi ndo.

¹⁷ Yañi, caahán ndaahvi yu tsihin ndo, jaha ndo cuenda tsi ndo tsihin ñi cuñi jasín tsi ndo, tan nducú ñi cuhva tsa nduva ndo tsihin tuhun Nyoo, tyin ñavin tacan cutuhva ndo tuhun ra Cristo. Ña cutahan ndo tsihin ñi can. ¹⁸ Tyin ñi can ñavin tyiñu Jutu Mañi yo Jesucristo jahá tyiñu ñi, maa ñi cuhva cuñi maa ñi javahá ñi. Tan jandahví ñaha ñi añima nyivi ndaahvi tsihin tsa vita caahán ñi. ¹⁹ Tandihi nyivi tsitó ñi tyin tyaá yahvi ndo tsi Nyoo. Yacan cuenda sihi xaan cuñi yu tsihin ndo, tan cuñi yu tsa yatyi javaha ndo tsa vaha. Maa tyin ña yatyi javaha ndo tsa ña vaha. ²⁰ Nyoo ra iyó tandihi tsa taxin añima, na cuhva ra tsa jaha canaa ndo tsi nu ña vaha tsa yatyi, tan na cuhva ra tsa cuañi ndo siqui nu. Na nasoco Jutu Mañi yo

Jesucristo tsi ndo.

²¹ Ra Timoteo ra cutahán tsihin yu nu jahá tyiñu ndi tyiñu Nyoo, jaquitsí ra nacumi tsi ndo. Tan tacan tucu ra Lucio, tan ra Jasón, tan ra Sosípater; tandihí ra ñuu yu can jaquitsí ra naha nacumi tsi ndo.

²² Yuhu ra Tercio javahá yu tutu ihya tsa cuenda ra Pablo, juvin ñi jaquitsí tucu yu nacumi tsi ndo tyin iin caa ñi yihí yo cuenda Jutu Mañi yo.

²³ Jaquitsí tucu ra Gayo nacumi tsi ndo. Vehe ra iyó yu. Juvin ñi ihya ndú iin tandihí ñi yihí cuenda Nyoo. Ra Erasto ra cuví tesorero ñuu ihya, jaquitsí ra nacumi tsi ndo, tan yañi yo ra Cuarto tucu.

²⁴ Na ndoo Jutu Mañi yo Jesucristo tsihin tandihí ndo. Tan na cuvi tsi tacan ñi.

Nu ndihí caahán ra Pablo tan jacahnú ra tsi Nyoo

²⁵ Tan vityin na jacahnu yo tsi Nyoo, tyin maa ra cuví ra cua cuhva tsa ndu iin iñi añima ndo, tyin tacan tan ña jandihí ndo tsa tsinú iñi ndo tuhun ra tsa jacacú tsi yo. Tsehe cuví tuhun caahán yu tan tuhun tsa jacuahá yu tsa cuenda ra Jesucristo. Iin ñi cuví tsi tsihin tuhun tsa ñuhu xeehe tahán tsanaha nda ndi cumañi ca tsinu ñuhu ñayivi. ²⁶ Maa tyin vityin jacuahá Nyoo tsi yo tsa cuenda tutu tsa nacoq ra cuví ndusu yuhu ra, ra tsaḥa cuenda tuhun ra tahán tsanaha. Catyí Nyoo, ra tsa ña cua cundihí maa, tyin vityin taahán tsi coto tandihí nyivi tyin tacan tan tsinu iñi ñi tsi ra tan tyaa yahvi ñi tsa caahán ra. ²⁷ Intuhun ñi maa Nyoo iyó, tan iyó xaan tsa tsiñi tuñi tsi ra. Tan na ña jandihí yo tsa jacahnú yo tsi ra tsa cuenda ra Jesucristo.

Tan na cuvi tsi tacan ñi.

**Tuhun tsaá tsa nacoó jutu mañi yo Jesucristo
tsi yo
New Testament in Mixtec, San Juan Colorado
(MX:mjc:Mixtec, San Juan Colorado)**

copyright © 1994 Wycliffe Bible Translators, Inc.

Language: Mixtec, San Juan Colorado

Translation by: Wycliffe Bible Translators, Inc.

Mixteco, San Juan Colorado [mjc], Mexico

Copyright Information

© 1994, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, San Juan Colorado

© 1994, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

c270ec54-172a-541f-83e6-7760f619c744